

固安文獻志卷十七目錄

耆舊事彙

清

楊明經蔭餘

楊都尉孫

楊訓導之暄

楊學博玄孫

楊檢討秀

楊訓導長子
印存遺像

楊縣令燧

楊訓導第五子

楊刺史煥

楊縣令燭

楊縣令國華

楊刺史長子
印存遺像

楊縣令輝燦

楊太守國翰

楊太守承湛祖

楊太守承湛

印存遺像并手蹟

楊太守靖

楊太守承湛長子
印存遺像并手蹟

楊處士潔

楊教諭步蟾

穆訓導得元

張縣令世桐

清翰林院檢討楊公秀遺像



清檢討楊掄升先生像詩

挹先生之貌溫潤而和平窺先生之神冲澹而清明
昔鰲禁珥筆今誰山授經浮雲閱變態久客無俗營
學與年俱劬身依道日亨士望比儀鳳人瞻同景星
羣岳宗泰岱衆水趨東溟知仁宜樂壽餘事陶豪英
康成書帶草瑞應叢階楹太液昌文運達材培國楨
玉皇香案吏緋魚帝所旌敢規簡傲士而沾隱逸名
吉月必朝服聖者垂前型韡哉稽古力覽圖榮桓榮
乾隆三十一年丙戌長至日里旬奉題

掄翁年伯大人尊照卽政

年姪薛宁廷拜稿

右詩在原像上端紙已壞損去十二字今補岱衆

水趨宜樂壽康成書太國等字未知合否

民國十七年夏六月

縣後學賈廷琳敬識

清 天 台 等 縣 知 縣 楊 國 華 遺 像



清署江寧等府知府楊公承湛遺像



楊太守園仙先生墨蹟

伏以賢俊之士固持有
挾持富貴之奉豈能為之
損益若其在貧賤之辱心
有無以異於今一朝居
傑之先而後知之貴然
元以將美之賢負傑果
才自遠方不素上於一
善在士流而不知不
欲袖手而歸道林書
清湖三石大

清署蘇州府知府楊靖公遺像



楊太守綬臣先墨蹟

建安之初五言騰踊文帝陳思繼德以
騎帝王徐應劉望跋而爭驅并憐風月
狎池苑迷思紫敘酣安豫既以任氣磊落
以便才造懷指事不求纖密之巧馳辭逐
貌惟取昭晰之能此其所同也乃王怡明道
詩雜仙心何晏之徒率多浮淺唯嵇之清
峻阮之遙深故能標馬若乃應璩百一獨立
不懼詳滴義貞亦魏之遺直也音世群才
稍入輕綺張潘左陸比肩待衡采緝於正
怡乃柔於建安或析文以為好或流靡以
自研此其大略也江左篇製溺乎元風嗚矣
狗彘之志崇感忘楨之漢表孫已下雖有
雕采而辭趣一揆莫與爭雄所以景純儻
篇挺拔而為俊矣宋初文詠體有因華在
先告退而山水方滋儻采百字之偶多價一
白之奇

固安文獻志卷十七

天津徐世昌鑒定

縣人賈廷琳謹編

耆舊事彙

清

楊明經廕餘

固安陳志篤行傳楊廕餘。康熙三十二年歲貢生。耿介勤學教
育多功。曾修補縣志。

又戚畹傳楊廕餘。字生之。駙馬都尉春元孫。都督同知光日子。
任錦衣衛都指揮同知。

楊訓導之暉

固安陳志人物傳楊之暉。字子陽。庠生。春茂之玄孫。親喪哀毀。骨立。殯葬如禮。生平不言人過。而能周窮乏。雍正五年。由廩生舉賢良方正。授廣寧訓導。廣寧紳士鮮嗜學。之暉捐重貲。興學。字循序教誨。生徒賴以鼓舞。當事服其才。議薦之力辭。

畿輔通志列傳楊之暉。字子陽。居親喪。哀毀骨立。葬祭盡禮。生平不言人過。好周貧乏。雍正初。以廩膳生舉賢良方正。官廣寧訓導。教士有方。務敦實行。當事嘉其賢。欲薦之力辭而止。

楊檢討秀

固安縣志選舉表楊秀。賢良方正之暉長子。雍正七年。舉鄉試第一名。八年。成進士。授翰林院庶吉士。擢檢討。陞侍講。

皇朝詞林典故楊秀。字掄升。順天固安人。雍正八年庚戌科進士。散館授檢討。

方城楊氏族譜楊秀之暉長子。字掄升。號素庵。又號容齋。雍正己酉科解元。庚戌科聯捷進士。初任翰林院庶吉士。再任翰林院檢討。

楊檢討遺著

今存序一首 碑記可考者一首

方城楊氏族譜序

萬物本乎天。人本乎祖。尊祖故敬宗。敬宗故收族。家有系譜。所以崇本原。聯同姓也。關係豈淺鮮哉。吾家得姓受氏。自唐叔虞封少子爲楊侯始。後著望於弘農。而占籍洛中。林慮則起於東

晉時。歷千有餘年。世遠弗詳。迨元至正間。值兵變。遠祖林州公。以義勇倡於鄉。保護村落。朝廷嘉其功。授以顯職。明洪武時。北略燕趙。我本邑始祖。因扈駕卜居固安城西南大辛莊。積德行仁。椒實繁衍。至七世都尉公尙主。而我楊遂爲固安望族矣。嗣後爵秩赫奕。科甲聯綿。列庠序者近百人。皆祖宗歷代積累。臻茲遐福也。第族大戶繁。現今在城在鄉。散處離居。常經年不相謀面。從前舊譜係抄本。因遭回祿遺失。無憑稽考。以故孫重祖諱。姪重叔諱者。往往不乏。余惴惴焉。惟渙軼是懼。再從弟燭令山西。欲出養廉所餘。鐫譜以垂永久。余與再從兄煥。因族祖潔圃所錄草本。詳加釐訂。壽諸梨棗。刷印成書。廣給族人。斯譜旣

成。世次朗而宗派昭。不但命名知所避忌。凡隸是譜者。咸思木本水源之義。篤恩誼。敦禮讓。勿以少陵長。勿以卑犯尊。而貴賤貧富。尤斷乎莫相軒輊焉。至於爲士爲農。人人各宜自愛。務期存心忠厚。行事端謹。出言誠實。而非道非義之爲。避之如仇。則守身卽以事親。事親卽以尊祖。俾世世子孫。有所觀法。永似續於不替。以綿我祖宗無疆之慶。是則余修譜之志也夫。昔乾隆四年歲在己未五月穀旦。十二世孫秀謹序。

右見楊氏族譜

重修固安縣廟學記

右碑在學宮戟門外西側。今已泐。存字無幾。

附錄

清貶贈翰林院檢討楊秀祖琰爲徵仕郎文制曰寵渥朝章錫類不遺於一命祥開家慶貶恩爰及夫重闈爾楊琰乃翰林院檢討楊秀之祖父弓裘衍澤瓜瓞綿麻作述相承再世式彰其祖武淵源有自一經早裕夫孫謀茲以覃恩貶贈爾爲徵仕郎翰林院檢討錫之救命於戲舊德弘昭用廣顯揚之志新綸特賁永增泉壤之光

清貶贈翰林院檢討楊秀祖母張氏爲孺人文制曰禮由義起弘孝治於中閨命自天申賁榮施於大母爾翰林院檢討楊秀之祖母張氏德懋蘭儀光生槐蔭珩璜作則式垂淑慎

之型。荇藻流芬。丕振光昌之緒。茲以覃恩。賤贈爾爲孺人。於戲。鸞書煥采。合彤史以揚麻。象服增輝。荷雲章而永慶。雍正十三年九月初三日。

清封贈翰林院檢討楊秀父之。贈爲徵仕郎文。制曰。宣猷服采。中朝扞報最之忱。錫類推恩。休命示酌庸之典。爾楊之。贈乃翰林院檢討楊秀之父。令德踐修。義方夙著。詩書啟後。用彰式穀之風。弓冶傳家。克作教忠之則。茲以覃恩。封爾爲徵仕郎翰林院檢討。錫之救命。於戲。篤生杞梓之材。功歸庭訓。丕煥絲綸之色。榮播天章。

清封贈翰林院檢討楊秀母齊氏爲孺人文。制曰。壺教凝祥。

懋嘉猷於朝。寧國常布惠。揚休命於庭闈。爾翰林院檢討楊秀之母齊氏。勤慎宜家。賢明訓後。相夫以順。含內美於甯璜。鞠子有成。樹良材於楨幹。茲以覃恩。封爾爲孺人。於戲。昭茲令善之聲。榮施勿替。食爾劬勞之報。慶典攸隆。雍正十三年九月初三日。

右語敕四首同見楊氏族譜

楊縣令燧

固安縣志選舉表。楊燧。賢良方正之暉。第五子。雍正七年舉人。乾隆二年進士。官山東新城海豐長清三縣知縣。江南山陽知縣。

山東通志名宦傳。楊燧。直隸固安人。進士。乾隆四年知新城縣。

改軍張聞爲壩。以杜啟閉之弊。重修桑公隄。立涵洞以防衝決之患。邑人勒碑紀其事。

又職官表楊燠。乾隆六年任海豐知縣。

方城楊氏族譜楊燠之。豐第五子。字秉陶。號啟亭。又號淇園。雍正七年己酉科舉人。十三年考授內閣中書管司局正字事。乾隆二年丁巳科進士。特簡山東濟南府新城縣知縣。

楊刺史燠

固安縣志選舉表楊燠。雍正四年舉人。十一年進士。任河南許州直隸州知州。

方城楊氏族譜楊燠。庠生之旺第二子。字輝斗。號邃庵。雍正丙

午科舉人。癸丑科進士。現任湖北岳池縣知縣。

河南通志職官表楊煥順天固安進士。乾隆七年任唐縣知縣。十一年任夏邑知縣。十四年任許州知州。

附錄

清地贈岳池縣知縣楊煥繼祖母劉氏爲孺人文制曰嘉績
聿隆於報最。弈世蒙庥。慈徽載著於地封。重闈襲慶爾乃原
任四川順慶府岳池縣知縣楊煥之繼祖母劉氏。珩璫傳芳。
蘋蘩濟美。溯貽謀於闈則。繼美益彰。弘錫類於朝章。推恩並
厚。茲以覃恩。地贈爾爲孺人。於戲。鸞書賁彩。普昭一體之榮。
施。馬鬣揚休。永表重泉之遺澤。

〔清封贈岳池縣知縣楊煥父之旺爲文林郎文〕制曰。求治在親民之吏。端重循良。教忠勵資。敬之忱。卅隆褒獎。爾楊之旺。乃原任四川順慶府岳池縣知縣楊煥之父。禋躬淳厚。垂訓端嚴。業可開先。式穀乃宣。猷之本。澤堪啟後。貽謀裕作。牧之方。茲以覃恩。封爾爲文林郎。四川順慶府岳池縣知縣。錫之敕命。於戲。克承清白之風。嘉茲報政。用慰顯揚之志。畀以殊榮。

〔清封贈岳池縣知縣楊煥母劉氏爲孺人文〕制曰。朝廷重民社之司。功推循吏。臣子凜水淵之操。教本慈幃。爾原任四川順慶府岳池縣知縣楊煥之母劉氏。淑慎其儀。柔嘉維則。宣

訓詞於朝夕。不忘育子之勤。集慶澤於門閭。式被自天之寵。茲以覃恩。贈爾爲孺人。於戲。仰酬顧復之恩。勉思撫字。載煥絲綸之色。永賁幽潛。乾隆二年三月初六日。

右同見楊氏族譜

楊縣令燭

固安縣志選舉表。楊燭。雍正四年舉人。八年進士。山西繁峙陽曲夏縣。河南扶溝。山東單。費。棲霞等縣知縣。

山東通志職官表。楊燭。固安進士。乾隆十五年任單縣。二十年。至二十二年任費縣。二十六年至二十九年任棲霞等縣知縣。方城楊氏族譜。楊燭。增廣生之暹子。字玉調。號泰三。雍正四年丙午科舉人。八年庚戌科進士。初任山西繁峙縣知縣。於乾隆

二年調繁夏縣知縣。於乾隆五年調繁陽曲縣知縣。

楊縣令遺著

今存序跋一首

方城楊氏族譜弁言

夫家之有譜猶國之有史也。國無史則繼承統緒紀月編年無所考究。家無譜則子姓繁衍支分派別無所釐訂。譜之所繫大矣哉。吾宗楊氏始於周。蕃於漢晉。歷唐宋而至元明。著名顯職兼復尙主爵秩崇高。遂爲方城望族。至我朝定鼎以來。科甲蟬聯。祖功宗德遠矣。第戶大族繁。從前舊譜慘遭楚炬。遂致散漫無紀。燭弱冠時。卽欲增訂譜系。乃以庚戌之役。命往山右。風塵鞅掌。案牘盈几。志焉未逮。已未春。嫡堂兄煥。再從兄秀。因族祖

國朝文獻通考
潔圃手錄草本。相與釐訂。考核詳明。告竣後。念燭向有鐫刻之
意。夏仲郵寄南安官署。燭挑燈讀之。若凡例。若恩卹。若碑記。若
行略。若世圖。若世表。無不較如列眉。犁然在目。燭不揣鄙陋。校
讐魚豕。鳩工剞劂。印刷成帙。徧送族人。俾各敦孝友。睦婣任卹。
保世滋大。以備輜軒之採風。則我祖宗詒謀之大。垂蔭之宏。藉
是以不朽。因譜成謬。厠數言於簡端。皆乾隆四年冬月下澣四
日。十二世孫燭敬誌。

右見楊氏族譜

附錄

清地贈繁峙縣知縣楊燭祖瑛爲文林郎文制曰考績報循

良之最。用獎臣勞。推恩溯積累之遺。載揚祖澤。爾楊璟乃署
山西代州繁峙縣知縣。楊燭之祖父。錫光有慶。樹德務滋。嗣
清白之芳聲。澤留再世。衍弓裘之令緒。祐篤一堂。茲以覃恩
地贈爾爲文林郎。山西代州繁峙縣知縣。錫之救命。於戲。其
修念祖。膺茂典而益勵新猷。有穀貽孫。發幽光而不彰潛德。
清地贈繁峙縣知縣楊燭前祖母王氏爲孺人文。制曰。册府
酬庸。聿著人臣之懋績。德門輯祉。式昭大母之芳徽。爾署山
西代州繁峙縣知縣楊燭之前祖母王氏。箴誠揚芬。珩璜表
德。職勤內助。宜家久著其賢聲。澤裕後昆。錫類式承乎嘉命。
茲以覃恩地贈爾爲孺人。於戲。播徽音於彤管。壺範彌光。膺

異數於紫泥。天庥永劬。

清地贈繁峙縣知縣楊燭。繼祖母趙氏爲孺人文。制曰嘉績
卅隆於報最。奕世蒙庥。慈徽載著於地封。重閭襲慶。爾署山
西代州繁峙縣知縣楊燭之祖母趙氏。珩瑀傳芳。蘋蘩濟美。
溯貽謀於閭則。繼美益彰。弘錫類於朝章。推恩並厚。茲以覃
恩。地贈爾爲孺人。於戲。鸞書貴彩。普昭一體之榮施。馬鬣揚
休。永表重泉之遺澤。雍正十三年九月初三日。

清封贈繁峙縣知縣楊燭父之暹爲文林郎文。制曰求治在
親民之吏。端重循良。教忠勵資。敬之忱。卅隆褒獎。爾楊之暹
乃署山西代州繁峙縣知縣楊燭之父。禔躬淳厚。垂訓端嚴。

業可開先。式穀乃宣猷之本。澤堪啟後。貽謀裕作牧之方。茲以覃恩。贈爾爲文林郎。署山西代州繁峙縣知縣。錫之救命。於戲。克承清白之風。嘉茲報政。用慰顯揚之志。昭乃遺謨。

〔清封贈繁峙縣知縣楊燭母邵氏爲孺人文制曰。朝廷重民社之司。功推循吏。臣子凜冰淵之操。教本慈幃。爾署山西代州繁峙縣知縣。楊燭之母邵氏。淑慎其儀。柔嘉維則。宣訓詞於朝夕。不忘育子之勤。集慶澤於門閭。式被自天之寵。茲以覃恩。封爾爲孺人。於戲。仰酬顧復之恩。勉思撫字。載煥絲綸之色。用慰劬勞。雍正十三年九月初三日。同見楊氏族譜。

楊縣令國華

固安縣志選舉表楊國華。乾隆六年舉人。任浙江天台蕭山嘉善秀水江西分宜知縣。

〔方城楊氏族譜補載〕楊國華。字青籙。許州知州煥長子。乾隆六年辛酉科舉人。歷任浙江天台蕭山嘉善秀水江西安義弋陽新建浮梁宜春分宜星子等縣知縣。丙子科浙江鄉試同考官。戊子科江西鄉試同考官。

附錄

〔傳經圖題詠〕竟日胡牀坐竹陰。半攤書史半橫琴。何人寫就傳經照。者是平生一片心。把卷牀頭尙小年。文情詩興一篇篇。競言生子當如此。不負秋陰課讀堅。奉題青翁老父

臺傳經小照。治弟崔謨拜稿。

又先生才如切玉刀。案牘剖決分毫毛。公退之餘經一卷。綠筠深處課兒曹。古人治經以經世。後儒車轍嗟阻滯。先生治術本治經。此意拳拳期子弟。清風一榻清復清。琴含靜趣竹無聲。豁然直與古人會。勃勃天機起妙英。青翁老父臺屬題。鏡亭徐澄。

又緩帶何冲融。科頭殊喂囁。納涼坐午陰。襪襪漫投止。清風來故人。披拂聊凭几。愛竹常思王。拜石似懷米。嚙嗜雛鳳聲。已向高岡起。傾耳欲忘言。琴書亦寄耳。誰將凡鳥題。展卷欽彼美。請歌有斐篇。還復誦樂只。烏兔弄雙丸。旋轉理可測。

目録
書長淨世氛。淡薄化胸臆。人事多滄桑。方寸參消息。海水浩
茫茫。神山渺難即。賤子行負薪。迺在北山北。昨者接南薰。一
一爲嘯植。始信卷中仙。爲我開顏色。好持千里懷。遠鑒良駒
德。治弟白水林有席。

〔又〕試才地無小。庚桑畏壘耳。治譜徑寸心。兩漢循良是。披圖
誰掃素。虎頭進乎技。精神動合眞。慘澹經營裏。手執一片玉。
溫良坐書史。世上任炎涼。素蘊無渣滓。介石聳峻嶒。薰風竹
根起。鳴琴多餘閒。一經自課子。我識畫中人心。知畫中指。奈
乏陽春曲。無能歌有斐。治弟鳳水趙被拜藁。

〔又〕唯天曠故高。唯地厚能著。人生天地間。云誰多踏跼。所以

豁達胸。隨境罔盈縮。傳詩傳禮總傳芳。積產積金空積俗。無
須廣廈萬千間。不羨繁葩競穠郁。箕箒幾箇任參差。塊石玲
瓏起且伏。位置有權宜。欄杆三五曲。偷得撫字片時閒。憇來
諦聽兒孫讀。兒孫讀罷議橫生。叮嚀還是塵俱撲。但得奇書
諳誦有傳人。琴古不妨彈調獨。對公道貌味公神。貌雍雍兮
神穆穆。平生長物百不攜。遮莫磷淄一片玉。君不見見騏驥千
里踏晴雲。電掣風騰誰繼躅。又不見鳳凰萬仞摩青穹。樊籠
世網難拘束。聞而意已驚。既見心誠服。若從吏事探良循。只
今越水吳山尙尸祝。邇來穀我婦子到洪都。樂只棠甘又蔀
屋。但有清白心。夢魂爲往復。用答乎主知。因貽後昆福。幾看

瑤砌繞琪花。喬皇歷歷生新馥。里句書塵青翁老父臺尊

照治晚生吳梧拜藁

右傳經圖今藏楊氏後裔
縣紳劉孝廉杜臣借示

楊縣令輝燦

固安縣志選舉表楊輝燦乾隆三十六年舉人任山東利津泗

水魚臺陝西褒城西鄉咸陽等縣知縣

山東通志職官表楊輝燦固安舉人乾隆四十七年任泗水五

十年任魚臺等知縣

附錄

清池贈泗水縣知縣楊輝燦兄賡楓為文林郎文制曰委質策名榮既膺夫簪紱克家纘緒光必逮乎門閭爾監生楊賡

楓乃原任山東袁州府泗水縣知縣楊輝燦之兄。道足持躬。情殷訓弟。經傳詩禮。青緇揚雁序之輝。慶篤芝蘭。丹綉煥龍章之麗。芳徽永懋。新典宜頒。茲以覃恩。賜贈爾爲文林郎。錫之救命。於戲。被章服以增榮。聿顯友恭之義。承絲綸而無忝。彌彰善慶之風。

清池贈泗水縣知縣楊輝燦嫂劉氏爲孺人文制曰。教佐義方。內則允彰夫懿範。榮敷閨闈。朝恩宜體乎私情。爾劉氏乃原任山東兗州府泗水縣知縣楊輝燦之嫂。貞淑性成。徽柔道協。身嫻姆訓。聿儲卓犖之材。志稟慈徽。用衍熾昌之緒。不昭淑慎。特賁絲綸。茲以覃恩。賜贈爾爲孺人。於戲。龍章式煥。

令儀著美于當時。象服欽承。名德益彰于奕葉。乾隆五十年

正月初一日。

右語勅今藏楊氏後裔
劉孝廉杜臣借字

楊太守國翰

固安縣志選舉表楊國翰。乾隆九年舉人。山西安邑寧鄉山東博平知縣。陞直隸州知州。

山東通志職官表楊國翰。直隸固安舉人。乾隆二十九年。至三十二年。任山東博平縣知縣。三十九年。四十年。任平度州知州。鄉賢楊綬臣先生傳略。曾祖國翰。字晴川。舉乾隆甲子孝廉。歷官山西安邑寧鄉山東博平等縣知縣。廣西永康州山東平度州山西霍州直隸州知州平陽府知府。

楊太守遺著

今存詩一首

柏井驛題壁

回首西風思悄然。南天門掛斗牛邊。條峰望斷浮雲蔽。汾水聲迴驚夢捐。歷歷芳田遵禹甸。重重嵐路趨堯天。而今未問升沈事。且喜十年衣錦還。

此先高祖晴川公乾隆二十七年任山西安邑。秩滿歸里題壁之作。先曾祖未齋公書於紈扇。因得保存。緬懷高曾規矩。穆然神往矣。民國十七年上巳。玄孫楊憲恭注。

右詩楊君淑泉寄示

楊太守承湛

徐世昌大清畿輔先哲賢能傳楊承湛。字閩仙。固安人。家貧力學。夕就帳中。然鐙自課。頂爲之墨。嘉慶九年舉於鄉。十六年成進士。以知縣分江蘇。補靖江。以母憂歸。服闋再補靖江。調南淮南。漕濱海。西連申江。榦河最要者曰閘港。潮汐往來。歲患淤墊。自乾隆四十年以往。久失修。宰斯土者。憚費鉅。役重。浚而塞者。屢矣。道光二年夏旱。江湖不至。浸成災。承湛下車。親蒞各鄉。周覽形勢。慨然曰。地方首務。其在斯乎。力請上官。疏濬之。晨出暮歸。賞勤懲惰。歷五十餘日。濬河三千數百丈。深廣逾昔時。丁旣竣。海水盛漲。兼颶風。民居卒無恙。鄉人額手交慶曰。楊侯活我。設祠祀之。竝刊碑樹隄上。八年調元和。逾年擢海門同知。未赴。

遭父喪北歸。縣人思之。值其誕辰。繪鶴南飛圖。賦詩賡和。承湛次韻。有北向哀鴻方戢影。南飛孤鶴尙祈年之句。服闋再補海門同知。調蘇州府海防同知。青浦民因漕糧聚鬩。數千人圍縣署。大吏以承湛有德於南滙。而青浦其接壤也。檄之往。承湛攜兩僕。棹小舟。易肩輿入城。衆擁輿不得進。告以委員姓氏。曰。是前宰南滙之楊侯耶。曰。然。衆謹呼曰。楊侯來。吾曹事得白矣。相率散去。承湛訊得其狀。治其倡首數人。餘悉不問。衆帖然。歷攝川沙同知。常州松江江寧知府。政績卓然。卒年六十五。

〔南滙縣志宦績傳〕楊承湛。字閔仙。道光二年任南滙縣事。首減白銀價。尤留意水利。浚閘港。周浦塘。皆按程課工。身自董治。必

如式乃已。厥後民賴其利三十年。

蔡綸楊侯督濬開港紀略。開港爲吾縣東南各區團蓄洩要河。潮汐往來。積沙易淤。道光二年夏亢旱。浦潮不至。支河盡涸。仲秋楊侯承湛蒞任。訪民間利病慨然曰。水利至要務也。曷可稍緩。申詳大憲。於正月二十日築壩。至三月十三日工竣。共計河身三千二百十二丈。濬土七萬三千餘方。侯一餐而出。自辰至酉。徒步數十里。口授指畫。勤者獎。惰者懲。從前業佃之偷減差徭之隱庇。匪棍之包攬。咸懾息不敢逞。民始憚其嚴。繼服其明。終樂其勤。懇誠篤。而恍然於一勞之可永逸也。某氏按云。是河開濬深闊。歷二十餘年尙賴其利。

南淮縣志道光三年知縣楊承湛濬開港。及北都台浦洪福橋港包家橋港。五年又濬周浦塘。深闊通利。民沾其澤。

先賢楊綬臣先生傳略。綬臣先生本生父諱承湛。字闓仙。舉嘉慶甲子孝廉。辛未成進士。歷官江蘇靖江南淮元和等縣知縣。海門川沙同知。署常州松江江寧等府知府。充道光辛巳壬午江南鄉試同考官。

又闓仙公於蘇州盤門新橋河沿之半月巷。闢治廣宅百餘楹。極亭臺花木之勝。道光二十三年。庭前忽產靈芝三株。是年綬臣先生即中試第三十七名舉人。公喜而題其室曰芝秀草堂。宅內有旁屋十三間。以居戚族之貧乏無依者。而飲食起居一

律待遇從未豐已薄人。當日合宅親丁戚族及僕役媼婢等共達八十餘人之多。可稱廣廈大庇矣。公好爲詩。遺稿散佚。先生蒐輯手鈔成一卷。顏曰芝秀草堂劫餘草。公宰南漚。浚治閘港。最有聲。會風災。居戶賴是獲免漂沒。活民無算。旋丁父憂。去任。數載後邑人思之彌篤。值公誕辰。紳士李吟香仿宋代慶祝蘇長公故事。繪鶴南飛圖。賦詩唱和。裊然成冊。公和韻有北向哀鴻方戢影。南飛孤鶴尙祈年之句。去官雖久。感人之深如此。

楊太守靖

固安縣志選舉表楊靖。字青士。道光二十三年舉人。

先賢楊綬臣先生傳略先生諱靖。字綬臣。晚號瓠叟。順天固安

縣人。由附生中式清道光二十三年癸卯科舉人。充覺羅官學教習。咸豐三年癸丑科特試內閣中書。入閣行走。四年補缺。充國史館分校。本衙門撰文。委署侍讀。八年俸滿。特分江蘇。以同知補用。九年充己未科並補行乙卯科江南鄉試同考官。十年署理蘇州府知府。兼督辦團練。籌畫軍事。鎮撫得宜。十一年保升知府。特旨賞戴花翎。同治初年。歷充如皋絲捐局總辦等差。十二年充海運津局會辦。保加三品銜。旋充蘇城保甲局會辦。光緒以後。歷充淞滬釐捐局總辦。海運滬局總辦等差。以勞績保升道員。遇缺題奏。特加二品頂戴。庚寅辛卯間。署理鎮江府知府。公正廉明。謹慎勤勞。愛人以德。治獄如神。凡地方公益。以

及各項慈善事業。無不捐廉提倡。竭力維持。民到於今稱之。先生好學之大儒也。愛才若渴。識力尤高。充同考官時。凡所薦舉。皆江南佳士。至今門下桃李。盡爲廉能之吏。其守鎮江也。下車伊始。首先課士。以觀文風。寶晉書院考試月課。以文字雅正。事理通達者列前茅。榜發。皆潤州知名士也。賞拔不虛。邑人傳爲美談。今諸士或著作等身。或高位顯達。樂得英才。先生有焉。先生秉性和平。宅心寬厚。而治家極嚴。內外肅然。事親至孝。出必告。返必面。無論寒暑。必盛服入見。不命之坐。不敢坐。不命之退。不敢退。循循然有禮焉。同父兄弟三人。先生居長。次諱翊。字贊臣。次諱昱。改名同炳。字耀卿。怡怡一門。友愛甚篤。先生視

諸姪輩如己子。同一待遇。毫無差異。教養以至成人。歷久而勿懈。今皆馳譽政途矣。先生曾祖諱國翰。字晴川。舉乾隆甲子孝廉。官至平陽知府。祖諱賡颺。字未齋。以川餉軍糧勞績。叙鹽提舉。父諱承澍。字芟田。以知縣銓選。本生父諱承湛。字閔仙。復舉嘉慶甲子孝廉。辛未成進士。官至常州江寧等府知府。胞叔諱逢春。原名承範。字洪士。又舉同治甲子孝廉。歷官河南襄城等知縣。均工詩善書。時人爲之語曰。祖孫科名三甲子。父子守令兩江南。一時傳爲佳話。且先生四世伯祖恭餘公。於順治戊子舉孝廉以來。世世相承。罔或有替。益見德門科第之盛。先生祖未齋公。少負奇氣。至性過人。長而工書善射。喜爲慈善事。

遇貧乏與急難者。必竭力資助。而後愉快。事後取所積契券。悉焚之。先生仰承家訓。忠厚相傳。凡戚友有借貸者。求無不允。或署借券至。先生輒當衆并喚諸子來前。示而燬之。曰。爾曹不可希望索債。若恃索債度日。是無志也。焚此以絕爾曹之望。人貴自立。爾曹勉旃。戚友見之。更爲驚感。先生善述祖志。此即仁孝之一端。清季仕宦子弟。每以納粟得官。先生嘗諭諸子曰。余家科第連綿。已二百餘載矣。爾曹宜自勵。須由考試得官。毋使前緒中墜也。又曰。余家爲關西後裔。世守四知之誠。清白吏子孫。固已然矣。子孫清白吏。尤其要焉。爾曹子孫。宜恪守毋或忘。告戒諄諄。垂爲家箴。其他嘉言懿行。未可殫述。 先生父閔仙公

宰靖江。先生生於任所。故以靖爲名。而字綬臣。迨公守毗陵。先生已舉孝廉。年僅二十三。巍科早掇。足徵善讀父書。先生工八法。酷似顏魯公。名聞大江南北。尤善飲。求書者以佳釀獻。輒對客揮毫。且曰。昔揚子雲草太玄。有載酒問字者。此固吾家故事也。其豪雅如是。蘇州鎮江名山大川。古蹟勝境。皆有先生所題之聯匾在焉。先生仕蘇凡三十六年。初爲合肥李文忠公撫蘇時所賞識。後爲南皮張文達公撫蘇時所倚重。蘇州之直隸會館。卽拙政園故址。亭榭池塘。竹石花木。風景至爲幽勝。南皮創其議。先生任其事。而南皮以政務殷繁。無暇握管。先生書法與之相似。故館中所懸之匾額聯對。凡題子青相國之名多出。

自先生所書。鎮江金山之至游堂。有子青相國所贈一額。亦先生代題者也。蘇鎮等處。摺紳諸家。凡求得先生一聯一扇者。皆視同拱璧。寶而藏之。先生好爲詩古文辭。有稿若干卷。名曰五石瓠齋集。取莊子五石之瓠大而無用之意。謙詞也。故晚年自號瓠叟。又自鐫有一小印。文曰薇省郎官。蘇州太守。每於所著詩文。所書聯扇。以此小印印之。先生故於蘇城。有某君挽曰。顏魯公政事文章。爲書名所掩。韋蘇州風流儒雅。以詩酒自娛。此可想見先生一生胸襟之坦白。品學之清高矣。先生生於道光元年辛巳四月二十日。故於光緒十九年癸巳。享壽七十有三。元配何氏。賢慧能詩。有留春無計。因春瘦之佳句。附錄

於五石瓠齋集中。繼配胡氏。仁慈知禮。生子三。長寶書。字玉森。更

齋官江蘇知縣。次子鴻書。字子儀。更名憲。號淑舉。光緒壬寅補科優貢。官金

壇縣知事。充國務院諮議。三子鳳書。歷充州縣錢幕。

贊曰。先生上承厚澤。下貽遠謀。明德之後。必有達人。文子文孫。或者述傳世。或幕席蜚聲。或專脩工業。或研求科學。胥趨身於文明學業之中。而哲嗣淑臬大令。由考試得官。公正廉明。謹慎勤勞。愛人以德。治獄如神。一如父風。近今列席中樞。參預國政。仕宦顯達。未可限量。諸哲孫頭角崢嶸。濟濟多才。先生之清德。後嗣之食報。千百世家庭幸福之長。其有涯乎。

楊太守遺著 今存墓誌銘一首 序二首 可考者一首 詩八卷三百餘首 錄四十五首

蘇州府海防同知署江寧府知府閔仙府君墓誌銘

右楊氏後裔家藏原鈔本另載本編耆舊碑誌卷

五石瓠齋詩稿自序

僕十歲始學爲詩。然未敢爲父師知也。則竊吮筆墨而識之。十四師指階下秋海棠命賦。操觚立就。師譽之。私心益喜。益學爲詩。間與同學友相倡和。亦彙而存之。道光癸卯年二十三。秋捷歸。則舉少時所爲詩。淘汰而纂削之。十留其三。名之曰卯角集。是後六上春官。來往於燕趙齊魯江浙皖豫之間。多感嗜唏嘯之作。曰公車集。咸豐三年癸丑。倬直薇省。珥筆之暇。吟興益豪。曰紅藥集。戊午出外爲軍司馬。兩載之間。得詩凡若干首。曰聽

鼓集。而總彙其前後曰卷石山房詩存。咸豐十年蘇城之陷。先
人遺書數萬卷。悉遭兵燹。拙詩亦燬焉。同治二年城復。復歸於
蘇。每憶舊作。輒筆錄之。全章斷句。十不得一。暇更足成曰燼餘
草。續以近歲之作。曰磨盾集。刻鵠集。芸香集。饒吹集。鼓吹集。石
請集。易其總名曰五石瓠齋詩稿。綜若干首。古來詩集之最富
者。白香山自寫詩文藏之名勝。前後七十五卷。詩筆大小三千
八百四十首。陸放翁詩初編四十卷。再編通前八十五卷。凡四
千數百首。可謂多矣。然其傳世初不僅係乎多也。古來以淹貫
稱者。劉歆總羣書而奏其七略。左思作三都而紙貴洛陽。可謂
博矣。然其傳世亦不僅在乎博也。或曰如子所言。得毋爲空疎

國朝文獻志
寡學者所藉口乎。予曰不然。詩以寫吾性情。而使媿雅者不敢議吾之俗。博奧者不敢議吾之陋。沈雄者研鍊者不敢議吾之薄。且易則取精華而棄糟粕。其詩之醇乎。是非余所敢希也。是則余所心慕也。遂書而自序於簡端。同治十有三年甲戌。綬臣楊靖自序。

五石瓠齋詩稿後序

士君子不得以其所學見諸行事。而徒欲以風雲月露之詞。傳於後世。抑末矣。漆園叟曰。名者實之賓也。吾將爲名乎。雖然。名之傳不傳。亦正未易言也。三百篇思婦勞人之什。當日祇以抒其胸臆。並姓名不著。非靳傳之久遠也。而千百世之下。尊之爲

經家絃而戶誦之。陶淵明栗里歸來。或飯不足也。而三杯之後。長歌短詠。不加藻飾。至今奉爲圭臬。楓落吳江冷。因全集藏拙。而雋語獨留。重陽風雨。爲催租人敗興。而隻句遂著。此皆無意於傳而傳者也。鉅卿偉人。名流碩彥。彫肝鋤腎。錯采鏤金。裒然大集。疊案盈尺。不轉瞬而蝨殘鼠齧。舉其名字。未有知者。吁可慨已。亦有零編斷簡。冷落市攤。遇知音者。百錢購去。補殘校譌。壽之梨棗。死灰復然。枯木重春。名之傳不傳。蓋亦有數存焉。而非人之所能爲也。僕老矣。安仁拙宦。已無伏櫪之思。吟詠一道。自維譎陋。難質大雅。亦如春鳥秋蟲。時至自鳴。所以彙而鈔之者。徒以數十年離合悲歡之跡。零落過半。存此區區。於風瀟雨。

晦之餘。舊夢重尋。自怡自歎而已。他日用覆醬瓿。所不計也。光緒十有一年乙酉。長夏重鈔再序。瓠窠時年六十有五。

常熟曾氏明瑟山莊集序

右係楊君淑泉惠函示及文缺

贈戈石林

臧雪樓曰。盛唐之節。沈宋之遺。

有女班姬。慧無兒伯道。傷漸看彫兩鬢。何以慰高堂。蘭弱不禁露。桐孤易感霜。年年壓金線。作嫁為誰忙。

乞假南歸渡江

時金陵潤州俱未復。楊見山峴曰。京口一聯神似新城。臧雪樓曰。收句從老杜萬方頻送喜。母乃聖躬勞得來。不

見痕際。

暫此辭鸚鵡。中流擊楫還。氛迷京口樹。雲斷秣陵關。日月催人

老風塵媿我閑。捷書今送喜。誰侍紫宸班。

秋懷

楊見山曰。極似少陵。

秋懷忽不懌。極目渺愁予。蓬梗天涯恨。觚稜曉夢虛。近惟詩是遣。常恐酒難除。十歲終貽悔。奔波誤讀書。

右詩三首見五石瓠齋詩稿一燼餘草

樂府鏡歌四首

竹書樂志曰。漢時有短箫鏡歌之樂。其曲有上之回戰城南。南巫山高思悲翁等凡二十餘名。列於鼓吹。多序戰陣之

事。及魏受命。改其十二曲。使繆襲為詞。故上之回為克官渡。戰城南為定武功。巫山高為屠柳城。思悲翁為戰荅陽。以時事地名為題。仿為四章。以歌武功。

克嘉定

楊見山曰。西涯樂府。又曰。四首不必規撫字句。而音節自然。入舌。夫惟大雅卓爾不羣。固知仿青妃呼豨口吻。真笨伯也。

克嘉定。發新硎。將卒精銳如雷霆。一擊賊膽破。三日不得醒。前時官軍若豚鼠。聞賊輒退見賊奔。臨淮壁壘嚴。旌旗色一新。逆

國志卷之八十一
酋未敢小嘗試。大起悍衆思并吞。初戰賊鋒挫。再接再賊壘平。追
奔逐北亡其魂。萬民懽呼額手頌。計日擒渠掃穴歌功成。

戰江口

三江口。扼我吭。黠賊悍衆來奮爭。三王併力。併力忘釁心。旌矛
蔽野。毒氛彗雲。磨牙楔狗。思噬人。我軍當之心不驚。以寡禦衆。
計定而氣沈。一鼓衆心奮。再鼓嚴令申。十盪十抉。賊勢崩。批亢
擣虛。倒戈奔。江波流血屍山屯。計功論賞。不自有其勳。曰奉天
子之威靈。

收吳郡

收吳郡。吳郡千年錦繡城。一朝陷作逆渠窟。虺蛇晝遊豺虎蹲。

湖山何清雄。負隅堅且深。公輸之攻功難。歲月成。桓桓隴西公。
恩威布。智勇沈。將士志一而力并。先翦其羽翼。繼攻其心腹。復
我疆宇。王路平。襁負歸來。婦子欣欣。殺人救人。王者兵。

復毘陵

復毘陵。破竹勢已成。更遇頑梗。抗我威棱。將士飲血。骸骨相柱。
撐。我公身督戰。號令重申明。遊魚釜底。終難勝。順者崩角。逆尸
橫。拔歸瘡痍。千萬人。殘黎何子遺。愁苦幸更生。似聞切切語。我
公戢武方施仁。

擣衣曲

楊見山曰。秋風能千里。羌無故實。自然獨有千古。非鍾鍊者所能夢到。

清怨耿遙夜。含情擣秋砧。秋風能千里。不敢送君聽。君聽能斷

腸更令傷妾心。殷勤寄衣使。休言此夜情。

企喻歌

楊見山曰。齊梁人語。

朝炊刁斗食。夜抱寶刀眠。壯氣嘯作虹。中宵長亘天。駿馬常苦羈。健兒常苦飢。蹀躞風塵下。長鳴秋葉飛。

長信宮

楊見山曰。初唐。

明月一以照。庭宇生光輝。自來長信宮。秋陰常凄其。微軀亦何惜。高寒難久虧。願爲下土冒。掃此雲霧霏。

小遊仙十首

吳約盒博曰。各有寄託。倘儻可喜。楊見山曰。唐實三昧。

柯爛棋方一局圓。壺中日月自繚延。滄桑三見塵生海。卻道麻姑尙少年。

駕鶴驂鸞謁帝居。龍吟虎嘯滿清虛。琴高仙去猶凡品。獨坐人間赤鯉魚。

朱鳥窗前許竊窺。憐才王母笑舒眉。仙厨不少胡麻飯。方朔如何令苦飢。

流電方看笑口開。無端威震忽驚雷。天公喜怒真難測。未許凡人解得來。

到底天公解愛才。謫仙猶許住蓬萊。夜郎一自長流去。應悔塵寰醉酒杯。

廣寒仙會舞霓裳。衆樂聲高夜氣涼。多事玉環私記譜。那從天上學宮商。

十二樓頭靚曉粧。吹簫遊戲白雲鄉。仙人亦自殊勞逸。織女機絲夜夜忙。

仙桂香飄滿帝都。廣寒宮殿嫩寒初。只知天上春常在。亦有秋風到玉除。

曾聞劉阮偶仙姝。弄玉吹簫事有無。天上果然無禁束。姮娥何事影常孤。

璇宮夜織錦初成。爛漫雲霞五色明。休怪人間矜一第。由來天上重科名。

擬古贈答詩二首

楊見山曰。起四句直上規十九首矣。

男兒生懸弧。四海猶比鄰。握手悲歧路。念此平生親。恩愛傷契

闊欲語不得伸。征鳥爲我翔。驪駒爲哀鳴。子歸無我念。軀名善
自珍。相期同白首。石泐志不泯。去去復歸來。相見雜悲欣。不記
傾蓋時。誼舊情如新。願爲連理樹。無爲秋天雲。

西風何蕭條。吹我行子衣。行子去不顧。想見心中悲。可憐心則
悲。歡笑猶昔時。不見陽鳥迅。顏光忽崦嵫。壽命會有盡。功名不
可爲。我有百斛酒。清冽甘如飴。留待子歸來。相與斟酌之。毋忘
夙夕約。路隔心不睽。羣飛尋巢鳥。日夕歸安枝。

右詩十九首見五石瓠齋詩稿二鏡吹集

木青山人詩草題詞

楊見山曰。神似寒郊。

耽吟李長吉。溷迹趙邠卿。心苦少歡語。才高多雅聲。卷餘滄海

氣氛靜闔闔城無恙家山在奚囊句好賡。

月夜聞笳圖

楊見山曰。收筆高岑佳境。

萬馬不鳴天近曉。西風獵獵笳聲裊。鐵騎前山正合圍。憑陵殺氣迷秋草。元龍意氣湖海豪。跳身履虎窺其巢。歸來聚米畫形勢。借箸前籌空爾曹。功成幕府論勳績。爛額焦頭稱上客。長揖軍門彈鋏歌。倚樹臨風自岸幘。榻來筮仕申江濱。酒酣抵掌更談兵。忽聞鬢栗城頭發。帳觸中宵萬里情。

獨遊治隱園

楊見山曰。神似四靈。

奇峯寫雲勢。老樹學龍拏。叢竹濃鋪影。幽蘭淡著花。懷人依落日。餘興寄流霞。惟有多情月。相隨更到家。

亡室何恭人不嫻吟詠而流覽者多時有好句去春感賦

小令有留春無計因春瘦之句清明上冢悼成一絕

留春無計因春瘦。往歲人憐覓句愁。今日何堪春似舊。萋萋芳

草滿山邱。

右詩四首見五石瓠齋詩稿三磨盾集

夜泊新安

楊見山曰。可入瀛奎律髓。吳約齋曰。清新俊逸。

帆背銜新月。船唇拂野花。篙迴驚宿鷺。棹急趁歸鴉。亂定村初

復。年豐酒易賒。莫辭行役苦。小醉傍山家。

擬李義山

莊中白忠楫曰。西崑名綺豔。多有所指。雖上法少陵實深得風人之旨者。擬作述離倘悅不讓玉谿生一步。

漫擬乘槎太液池。王喬飛鳥早相期。身難隱豹時方泰。技學屠

龍悔已遲。曉夢迷離。防蜨幻。春工辛苦。問花知。呢喃莫怪梁間燕。多少癡聾喚醒時。

閒述擬放翁

楊見山曰。置之劍南集中。不辨。格葉。吳約齋曰。得放翁之神。

水國蕭疎紅蓼殘。忘機魚鳥亦相安。臥遊新製瓜皮艇。充隱還成筍籜冠。撫劍每增豪俠感。供花權當美人看。平生無補人間世。學圃聊分稼穡難。

右詩三首見五石瓠齋詩稿四刻鵠集

五人墓

吳約齋曰。胎息自古。楊見山曰。古樂府佳境。臧雪樓曰。前篇但叙當日情事。不加議論。以末一句結出全神。以上字字皆有握拳透

爪之勢。真畫龍點睛手也。而先生之性情胸襟。亦於是乎見。

堂堂幕府闔寺奴。忠義乃在市井徒。一朝奮擊衆情怒。千秋留

得五人墓。緹騎何洶洶。銀鐺手擲聲琤琮。威燄薰灼生祠崇。小人何知魏上公。萬姓伏。緹騎怒。萬姓怒。緹騎伏。還汝銀鐺噪且逐。一羣豺與狼。斯須飛血肉。上公聞之心膽縮。兇燄爲此遽收束。飛章告變伊何人。窮治五人亡其身。惜哉當日何不一場決殺徒紛紜。

廷琳五人之事。至今無不痛言。蘇民以媚權閣者可比。不知千百。錄載毛與巡按徐吉所同上之封章。於蘇民則矜矜多方保全。於緹騎則警其因需索而激變。並非一味殘殺蘇民以媚權閣者可比。不知千百。年何以享惡名如此。此詩飛章告變云云。蓋亦指毛言。故附爲之辨如此。

送人之衡州

臧雪樓曰。當與龍標方駕齊驅。楊見山曰。只絕句二十八字。而章法句法字法純乎唐音。允推壓卷之作。吳約齋曰。氣韻超邁。

十幅蒲帆楚客舟。江亭風葉助離愁。寄書莫倚南飛雁。聲斷衡

陽浦上秋

金陵曉發

楊見山曰。一起與大江流日夜。並有千古百戰十字。粹然唐音。潮聲警殘夢。可入摘句圖。收亦不懈。四十實人。不著一屑沾兒矣。

雄城瞰石頭。日夜大江流。百戰此餘壘。六朝同一邱。潮聲警殘夢。山色帶平疇。破曉挂帆去。好風來送舟。

逡巡曲送友之洛陽

楊見山曰。神似太白。

酒盡復逡巡。清歌送遠人。請看洛陽市。無復昔時塵。弱柳能延日。餘花解殿春。相思更相望。江上有歸鱗。

右詩四首見五石瓠齋詩稿五芸香集

旅館醉賦

楊見山曰。選樓舊句。

修途及三春。旅懷耿秋思。行行殊未已。暮倦且停轡。時鳥喉新簧。繁葩媚幽致。如何遊子心。不與春風被。勉言酌清酒。酣歌發紆意。歌成變徵音。聽者感嘯噓。鬱志無歡聲。早爲離心醉。

响嘒碑

莊中白曰。橫空盤硬語。直可平睨昌黎。楊見山曰。此體創於中唐。近代金石家專肆此派。其實本不可廢。不過不必專以此見也。作者

通實于虛。典竅之中。庸淵雅緒。不必以摹韓始為善好。吳約齋曰。妄貼排真。摹韓便似韓。

唐堯草昧天地荒。妖魅白日紛縱橫。天生聖禹秉符瑞。豢龍押虎。日月光刊山。導水到南服。衡嶽作鎮尊。炎疆紀功响嘒。辟不若。大書深刻巔崖旁。奇文倒薤匹符篆。作隊鸞鳳爭迴翔。孫祢科斗祖卦畫。繆結龍蛇昭雲章。風雨不蝕日不鑠。丁甲所護神所防。蠶空綿歷數千載。劫火辟易莫敢傷。好事摹拓遺此本。神完字足光輝煌。舌橋目瞪不可讀。魂驚膽悸徒徬徨。古人好古拘咫尺。周宣獵碣詮釋詳。目眯巨寶誰過問。坐令萬古成痴盲。不如贗物巧模鑄。商盤周鼎侈揆張。或者神蹟天所祕。苞符未

許俗子量。撫摩終日三歎息。寶山枉入空回檣。

閨怨

吳約。魚曰。清嚴。凄惋。語妙。含蓄。楊見山曰。起似西傑。收似仲初。

春風樓外花發時。春風樓上曉鶯啼。鶯花有信隨春至。客子春來胡未歸。對鏡慵妝弄金爵。恰見釵頭雙鳳索。手拈釵鳳暗傷神。試點油花向天下。吉兆庚庚神有靈。眉梢喜色動盈盈。下階獨向花間立。剝啄何人側耳聽。

右詩三首見五石瓠齋詩稿六鼓吹集

漁洋秋柳詞。感福王而作也。漁洋先世世襲簪纓。位高祿重。漁洋入國朝。掇巍科。登臚仕。去明亡未久。睠睠故國之思。不能自己。當時或遇舊人。或談舊事。或聞天寶宮人流落。

民間皆不可知。詩作於涕上。而起句先標明白下。其旨可見。中間帝子公孫皆有所指。青荷黃竹。桃葉桃根。或指宮人。梁園愁侶。則指舊人。幽情蓄念。不敢質言。故借秋柳以寄意。低徊悽惋。使讀者不覺唏噓之無從。予前有續貂之作。祇借秋柳寫一時之感。茲更擬四章。專明漁洋旨趣。仍用原韻。

莊中白曰。纏綿悠揚。感唱無盡。大有新城風韻。

金城眺罷愴芳魂。濃蔭曾依舊戟門。飛絮隨風悽斷夢。柔條和雨拭啼痕。甘瓜誰種青門路。離黍空傷獨夜村。休向嬋娟鬪眉嫵。細腰宮裏事難論。

隋隄誰與唱繁霜。憔悴青蒲共晚塘。喬木風煙悽玉壘。故槐門

第憶青箱。江頭蹀躞思遺老。杜宇悲啼感蜀王。悵望永豐殘照裏。更無人說大功坊。

蛺蝶香銷舊舞衣。靈和宮殿是耶非。雲眠太液春波杳。宿闥前星曉夢稀。去國斷鴻江驛宿。辭秋旅燕謝庭飛。門前五樹柴桑種。彭澤高風願已違。

蘭嗁蕙怨絕堪憐。披拂長條已化煙。板渚傷心歌絮絮。琅邪大道恨綿綿。六朝金粉同陳迹。一色青旗異昔年。莫更言愁向司馬。龍池夢繞五雲邊。

右詩四首見五石瓠齋詩稿七石請集

落葉四首和洗蕉老人原韻

喬柯接葉舊巢鶯。寥落無端愴序清。幾夜霜華催晚景。四山風
雨動秋聲。飄零大樹將軍去。蔽芾甘棠父老情。颯颯哀吟碣響
答。驚迴孤雁悵南行。

補隙山光日夕佳。衆峰競秀若安排。黃花繞圃堪娛晚。紅樹干
雲好放懷。豁達一庭添氣爽。掃除三徑把愁埋。歲寒松柏長葱
蒨。恰對前楹手種槐。

幽窗忽見月華臨。每憶森森夏日陰。高幹舊承穠露早。交柯遠
蔭大雲沈。謝庭柳絮吟懷逸。南國蘋蘩禮意深。畫荻傳經辛苦
夜。歐陽讀罷感秋心。

花時珍重護金鈴。愛惜春光坐小亭。物變候驚霜信報。山棲愁

向酒邊聽。蕉心尙捲經。堪寫柿葉供書筆。不停愧我先零蒲柳質。勉將華語駐頽齡。

僧文高小像

獨立絕塵想。曠然超九鴻。無眼耳鼻舌。四大皆虛空。百丈須彌山。拾納芥子中。古今渺瞬息。萬劫環無窮。藐躬已懸疣。胡乃贅一童。矧茲身外身。負累巨虛蛩。乞師下轉語。妙諦開愚蒙。上人豎一指。覺悟參天龍。莊嚴千萬像。那介我佛胸。秋潭各有月。圓靈自昭融。

右詩五首見五石瓠齋詩稿八倦羽集

以上各詩楊君淑琴代造

楊處士潔

固安陳志文翰傳楊潔字蓮修性穎異好誦讀年逾七旬猶不釋卷亦工書畫。

畿輔通志列傳引永清志楊潔字蓮修固安人善屬文父官閩

中

按縣志楊維詰乾隆十七年舉人曾官福建永福福安等縣知縣疑即爲處士之父潔爲閩產父歿後潔自閩歸

田園廬舍悉爲族黨侵蝕介然不與爭寄食戚家日以詩畫自娛晚構草堂數椽僅蔽風雨處之泊如也

清劉仲篋耆舊詩序楊布衣蓮修先生名潔固安人流寓於永清遂家焉明駙馬都尉春元其先世也父官閩中先生生於任所父卒羈留數載始歸途次值高宗純皇帝南巡凡奧區名都皆大興工作而餘杭之湖壩一帶爲尤勝先生徜徉其間者累

月。當是時世運昇平。湖山生色。先生以名家世胄。畫船簫鼓。吟嘯留連。以抒其蘊蓄。雖鐵崖子不是過也。歸後廬舍田園。盡爲族黨所侵沒。先生介不與爭。寄跡於戚舊間。日以詩畫自娛。晚歲構草草堂。茅屋數椽。僅避風雨。環堵蕭然。先生泊如也。與先兄詩橋爲文字交。爲之賦草堂歌以紀其事。先生次子號古愚。亦善畫。頗能承其家學云。

廷琳按楊處士晚家永清。與其縣劉詩橋癡雲兩先生爲文字交。當在道光中年。我縣咸豐中纂志。距處士時代甚邇。乃所爲小傳。只寥寥數語。且於姓上誤刊邵字。遂令處士誤蒙他姓。不知當日何以疏忽至此。迨光緒中修順天

府志。又不加詳察。誤以處士爲明季人。列之明代隱逸傳。

有此兩誤。而處士之姓字。愈沈埋無人知矣。近人陳去病所著明遺民錄亦謂載之

廷琳既得詩。橋癡雲兩先生所贈處士詩。爰錄入編中。以

存處士梗概。又惜處士所著詩集。屢次託友朋尋訪。竟無

從得。殊爲缺憾云。

楊處士遺著 今存詩二首

七十自述

不聞金經不鍊丹。都將人事付天緣。安貧守拙從吾分。也過浮生七十年。

右見永清劉仲篋著舊詩注

過三蘇祠

按蘇公洵曾授文安縣主簿。故今文安縣屬蘇橋鎮有老泉祠。而二子亦祠祀焉。然當日老泉實未嘗履任至此。此詩疑即處士過

蘇橋鎮作也

三蘇未到此。乃有三蘇祠。安石惠卿生同時。當世人民羞道之。嗚呼丈夫立身好自持。君不見三蘇祠。

右詩係永清劉君雲孫

即劉仲儻先生之孫

得之張君鶴泉口述者

附錄

清劉伯埴草草堂歌贈楊蓮翁。人家三五荒城東。亂鴉噪樹蟬吟空碧。蘆嫋嫋搖清風。茅椽三五縛當中。中有高人把卷讀。讀盡少年成老翁。翁是於今隱者流。襟懷颯爽凌清秋。撐腸拄腹富書史。詩情畫格高無儔。學成不肯拾青紫。汗漫

翻爲萬里遊。萬里遊。良不惡。颶風瘴雨潭州泊。深箐煙暝搏
山魈。黑浪雲愁揖海若。豈必防身倚長劍。生平俠氣森磅礴。
忽憶西湖北。走越挂帆卻看揚州月。半壁江山筆底收。笑探
奚囊驚突兀。歸來賣畫長安陌。掉頭不作侯門客。村居漸喜
人不識。春深草長幽人宅。啼鳥聲聲喚晝眠。孤吟坐對晴窗
碧。世人囂囂我獨默。誰歟晤語呼子墨。身外浮雲一笑看。草
草名堂良亦得。噫嘻人間萬事俱草草。風簫過耳鴻印爪。子
雲之亭蔓草荒。浣花舊迹風煙杳。惟有琅琅身後名。到今更
比當時好翁今。已著等身稿。懸知舉世珍鴻寶。翁與此堂俱
不老。嗚呼翁與此堂俱不老。

見舊鈔本鶴巢詩集
現爲余无悶齋所藏

清劉仲篋者舊詩詠楊布衣蓮翁瀟灑楊蓮翁吾鄉老詩伯
畫派擬倪黃詞源挹元白先生名家子仕宦盈臺閣獨以松
鶴姿棲遲老巖壑予年方弱冠問字時相索適值草堂成先
生新卜宅天然好隱廬四面風塵隔柴門欵水隅茅屋偎林
薄榆柳蔭軒楹桃李護籬落幽窗置疎櫺兩扉少丹牖矮几
播殘書四壁無坊堊高張無絃琴清唳孤棲鶴藜牀坐已穿
竹杖方未削皤然白髮翁風骨自超卓形貌頗清癯精神彌
矍鑠倒屣相承迎雅不輕稚弱娓娓述生平傾吐無捍格先
生爲予言往跡渾如昨年方二十時萬里曾爲客八閩吾舊
游維揚及吳越蜀岡探晚梅虎邱弄秋月錢塘曉乘潮西湖

春待泊。白嶽松石奇。巖瀨江山邈。炎嶠瘴癘深。溟海波濤惡。
十年汗漫遊。揚州夢已覺。翻然返故園。廬敞無棲託。寄迹戚
舊間。努力日勤學。毫素抒性靈。詩書濯魂魄。生計苦蕭條。情
懷甘落寞。人事付天緣。浮生七十適。見先生七十自述身健而心閒。世
間清福澤。壯哉先生遊。清矣先生格。無何遭微疾。了不事醫
藥。依枕囑兒孫。汝曹毋驚愕。吾今委形去。渾若風吹蔴。詩卷
寄中麓。畫稿貯囊橐。緘識好收藏。毋使蠹魚咋。詩人楊蓮翁。
五字銘吾爵。至今墓木拱。樹石尙闕略。豈無綿薄力。念之心
慚忤。詩成抱膝吟。老梅花始著。幽香沁肝脾。至味耐咀嚼。默
契歲寒心。相期會冥漠。見舊鈔本耆舊詩

楊教諭步蟾

固安陳志文翰傳楊步蟾字桂山號秋浦嘉慶二年舉人授交河縣教諭性嗜學湛深經史課士先孝友而後文章嘗曰士人首重立品次重經術舍此不講徒以揣摩之技弋取科名非務實者所尚也知縣唐維釗稱其學問深醇制行高潔無愧士林楷模。

穆訓導得元

固安陳志文翰傳穆得元字東軒天性孝友與人無忿爭事好讀書著詩集數卷知縣李光理稱其有盛唐諸老遺風童試時聘署中閱卷

按聘署中閱卷乃陳公琮非李公光理也詳見下

餽以米辭不受以廩貢選延

慶州訓導。以作養人才爲任。舉孫金度優行。士論翕然。嘉慶六年恩賜舉人。七年會試恩賜國子監學正。

畿輔通志列傳穆得元。字東軒。天性孝友。好讀書。與貢生卜大醇俱以能詩聞。著有漸于集三卷。按當作官延慶州訓導。

穆寶巖。漸于集跋先祖東軒公。係吾曾祖崑山公第四子也。生

於雍正八年。幼而穎異。出入孝弟。言行謹信。里中嘖嘖咸歎異

之。好讀書。目四行下。年十二三。興之所至。即能擗管爲詩。十五

入縣學。十九食廩餼。教諭戈公錦泉。按戈名雲巖。景州人。乾隆元年舉人。十二年間任固安教諭。舊志

載。失。薦舉優行。按鄉土志謂乾隆間應鴻博。未中選。考鴻博試在乾隆七年。東軒先生方數歲。似戈公所薦舉者。即乾隆十五年經學考試。先一二

年由縣學薦優行諸生名。於學使者及試而未錄也。本縣童試。知縣陳公。按縣志名琮。四川南部人。迎吾祖閱

卷往返再三始就。及事竣贈以米二十石。不受。其後李公鄒公

按李名光理安徽廬江人鄒名試湖北漢陽人

履任俱待以客禮。嘗索詩稿。而吾祖窮年兀

兀日以筆硯爲事。絕不干以私。雖值嚴寒盛暑。未嘗頃刻廢學。

博通經史子集。旁及地理醫書畫法。而於詩尤苦心孤詣。所集諸家詩不下百餘種。各加手校。有疑義必精覈之。在國子監肄業時。屢冠諸生。修道堂朱公語同寅曰。此無雙士也。及鄉試屢薦不第。識者咸嘆惜焉。家素貧。以硯田餬口。遇貧乏者脩金不取。尤善誨人。遠近受業者數百人。一經陶成。率成知名士。即士之未列門牆者。亦無不以吾祖爲依歸也。然生平謙謹和平。不炫已長。不揭人短。故雖學問淹博。而猶循循乎如下學。然晚年

官延慶州教職。地極清苦。而吾祖清潔自矢。年俸外絕無妄思。更爲因材施教。鼓舞獎勵。文風蒸蒸日上。門生孫金度等相繼登第。在官六載。大計考語云。力健政勤。守堅才裕。宣化守蘇公王公口北道索公。皆相推重。常有詩唱和焉。嘉慶六年辛酉科鄉試。恩賜舉人。七年會試。恩賜學正。八年正月卒于官署。年七十有四。官民遠近。無不焚香叩奠。靈輿歸。護送數十里外。吾祖學行之感人。大率類此。所著有四書文詞賦序傳若干卷。皆精湛切當。不襲詞華。而於詩尤得宋元及本朝諸大家神髓。顧以貧不能問梓。謹藏篋中廿餘年。有吾父執友崔香圃。孝廉名蘭者。亦吾祖門下士也。懼遺稿久而散失。會同執友馮孝廉順等。

捐貲付刊。謹選登各體詩三百餘首。成漸于集四卷。而當時與吾祖酬答諸友之詩。舊額曰良朋惠寄。亦附刊焉。方今國家以經義取士。次及於詩。鼓吹休明。聲律固駸駸乎駕唐而軼宋也。今香圃先生釀貲梓行是集。上以鳴一代理人文之盛。下以公梓里同人之好。而且使吾祖畢生著述。得以信今傳後也。其惠我穆氏。豈有涯哉。道光七年孟春。孫男寶巖敬跋。

穆訓導遺著

今存賦一首 詩三百餘首 錄二十首 附見他卷五首

振足賦

思振足於天衢兮。季女贈余以綠華。乘姑射之雲氣兮。挽滄海之飛霞。結瓊瑤之玉佩兮。衣龍綠之寶紗。渴則漱石髓以如膏。

兮。饑則餐棗實而如瓜。引洪崖爲知己兮。偕橘叟爲一家。朝發
輒於縣圃兮。夕周覽乎天涯。俟遊觀之旣倦兮。徐焉駐足於山
了。

右見漸干集四

題畫二首

斷嶺遙分翠。參差怪石連。人蹤不到處。流水自潺湲。
青山深復深。雜樹遮山麓。山麓樹罅中。彷彿見茅屋。

官舍閒吟

邱壑平生志。宦遊仍在山。起居青靄裏。出入翠微間。槐繞官衙
綠。花當講席殷。課餘無別事。門趁夕陽關。

官舍夜吟

廣文官獨冷。此地恰相宜。塞近迎寒早。山深得月遲。課書頻翦燭。看劍幾傾卮。吾自尋吾樂。良宵一詠詩。

土木道中口號

漠漠平沙迴。蕭森古木秋。荒煙連遠戍。野水入閒流。故壘何時壞。殘垣不復修。幸逢太平日。禾黍滿田疇。

夜坐

夜坐驚秋早。高齋雨過涼。半鉤斜月影。一段晚花香。爽借風爲扇。柔憐露浥裳。此中有佳趣。得意可能忘。

春晚

一歲春將歇。幽齋興不違。掃花香上帚。折柳絮沾衣。靜喜鶯留久。閒宜客到稀。有時詩得句。高唱發天機。

夏日即事

近因幽興極。全與世情疏。掃徑苔凝帚。耘花蝶避鋤。爐煙看裊篆。鼎沸聽盤車。倦臥時成夢。人來送異書。

歲杪

客館虛留滯。驚心又一年。髮增愁裏雪。硯廢病中田。柳色偷春早。梅花得氣先。此般新意象。入望自悠然。

題李樓舊居

繫馬閒庭下。徘徊望落暉。新花紅自豔。蔓草綠偏肥。壁上琴如

舊。人間世已非。吟成誰共賞。愁坐釣魚磯。

舟行平洋淀口號三首

輕搖柔櫓入平洋。一片虛明瀲灩光。綠樹陰重茅屋西。人家宛在鏡中央。

紅蓮花似出方諸。艇子輕搖入畫圖。欸乃聲驚鳧鷖起。飛飛遙趁半蒼蘆。

帆影聯翩掛夕陽。纔過柳岸復菱塘。遊人莫說西湖好。佳景何曾定在杭。

桃花

何處清香作陣來。桃園似錦正花開。鶯穿樹底梭如織。燕掠枝

頭翦欲裁。黃襯柳絲金裊裊。白兼梨蕊雪皚皚。韶光引我豪遊興。醉月還應夜舉杯。

春晚雨後曉行口號

春郊雨後畫難成。信馬騰騰趁曉行。翠綰柳絲煙穗重。紅滋花面露珠瑩。遙遙瑞靄周遭合。淡淡香颺斷續生。更喜插犂今未晚。隔林時有叱牛聲。

遣興

未許幽齋語坐忘。怡情且自任徜徉。愛邀明月疎栽竹。貪看青山短築牆。雨過柳塘添嫩翠。風穿花徑帶微香。箇中滋味如堪領。省讀南華內外章。

山村

山村有景定如何。綠凸雲鬟幾萬螺。馬踏花蹊香裏度。人穿松樹畫中過。峰頭點白浮圖遠。石面皴紅古寺多。况是韶光春正媚。登臨恰好趁晴和。

陟西山

寒山枕西郊。岡巒幻奇狀。迴伏勢如龍。矢矯難爲像。我來尋異迹。縱步襟懷暢。怪石猛獸形。突出森相向。枯松俯長溪。根盤掛疊嶂。冰泮泉聲響。水與石相宕。鬱紆造山巔。萬里窮一望。大哉造化功。生物豈有量。憶昔夢西湖。目極神蕩漾。今我陟西山。高踞羣峰上。山水信壯觀。達人任放浪。性本愛邱壑。斯遊詎能忘。

極目

緩步步郊原。極目高秋景。蒼煙林外斷。平瀉夕陽影。簞覆綠微
茫。罽分麥萬井。遙天髻髮鬢。碧聳參差嶺。小溪略約橫。佇立心
神靜。披鏡窺游魚。水清露千丙。乾坤晚愈妍。次第呈佳境。盡收
入畫圖。恐禿山中穎。

思歸

淵明昔移宅。爲就素心人。賞奇兼析疑。樂事得其真。余家方城
南。倚山負水濱。榆柳綠匝牆。苔痕翠覆茵。春秋足佳日。求友實
勞神。乃者有王生。卜居一何新。廬宇遙相望。於我若比鄰。昔是
舊知己。今復近相親。何事余西來。硯田羈此身。相思輒不遂。幾

許負良辰。過門誰相呼。有酒誰同斟。日夕惟獨坐。所對壁上琴。
古人有曠懷。我輩何沈沈。行將歸故里。把臂共入林。

右詩二十首同見漸于集內官舍夜吟夏日卽事二首又
見清陶樑畿輔詩傳

張縣令世桐

固安陳志篤行傳。張世桐。字樹屏。乾隆五十九年副貢。由教習
選江蘇陽湖知縣。俸滿告歸。其品學高潔。爲邑人所推重。

武進陽湖合志名宦傳。張士桐。字樹屏。直隸固安人。副貢生。任
陽湖知縣。嘗濬南運河。護城河北塘河。

張縣令遺著

今存碑記一首 詩一首

重修三大士庵碑記

右碑在固安縣治西北另載本編金石文存卷

題錢斗南賑廠圖

天道本難窮。秋成不盡豐。凶荒民失所。調劑賴人工。司牧堂懸
明古鏡。救荒何憂無美政。請糧施粥力能爲。那堪胥役貪殘性。
蠅趨鼠竊如卮漏。呼蹴沾汗等飼獸。有口不思同嗜心。救民反
致戕民壽。斗南錢子勵清操。屈身刀筆隸庫曹。歲值旱荒司施
粥。怛懷剔弊不辭勞。無法有弊畫難周。弊剔法疎弊總留。公今
不使毫髮易。便宜尙待細心籌。凌寒鵠立忍調飢。滌釜燃薪愁
蹙遲。不是勞心預經畫。煢煢徒自費嗟咨。錢子奉公無玩愒。能

教反否成康泰。畫圖立約告來人。共體皇恩俾滂沛。

固安陳志云。嘉慶二十二年固安秋旱。西南一帶大饑。縣令詳明上憲。奏撥漕米二千石。於被災村莊適中之區。煮粥設廠施賑。以鄉紳士司其事。時錢君斗南實司管庫。凡三閱月。目擊災黎。繪圖于冊而爲之說。名流題詠佳篇甚夥。

廷琳按錢斗南名錫魁。在當日不過戶書等末職。而居心仁慈。能使實惠及人。實可嘉尚。迺順天府志。見固安職官表內有姓錢名缺未刻者。便臆斷爲錫魁。將其名填入固安知縣表中。至官師志更爲錫魁立一專傳。謂其于嘉慶二十二年知固安縣。因歲旱設廠賑饑云云。考傳中語皆

藍本於張縣令此詩。而於詩之全文則未寓目。不知當日何以鹵莽至此。又按錫魁工山水。余村伴書草堂李氏藏其所繪扇面。筆墨甚爲超逸云。

右詩見固安陳志藝文

楊太守靖遺著補遺

像贊一首 詩一首

翰林院庶吉士寧州張公孝時像贊

是何氣象。河嶽之靈。是何骨幹。金石之精。是何儀度。詩書之英。千秋萬世兮。惟師保之如臨。

光緒五年秋九月

右見清張孝時筠心堂存稿卷首

和先曾祖晴川公安邑任滿柏井驛題壁原韻

歸裝琴鶴意。悠然旅館愁。心到酒邊報。最致成留去思。惠民福
在不唐捐。琳瑯珍重貽孫子。簪笏連綿感帝天。百卅年來傳四
世。殘牋一幀擬珠還。

右詩楊君淑泉錄示五石瓠齋詩稿未載

固安文獻志卷十八目錄

耆舊事彙

清

王總戎普

印存遺像

王縣令文煥

王總戎第三子

高主政釗

高國學鑑

高主政弟

趙明經錫純

萬國學三錫

萬國學湘林

萬國學三錫孫

賈公諱光明
孫男廷琳敬錄

曹明經飭

李國學培源
李明經父

李茂才滌源
李明經族叔

李明經仲瑄

文茂才藻翔

朱處士琳


魏明經聯芳

李明經芳園
印存遺像


石武孝廉蘊芳

王茂才芬

清河鎮總兵王公普遺像



清拔貢生李公芳園遺像



固安文獻志卷十八

天津徐世昌鑒定

縣人賈廷琳謹編

耆舊事彙

清

王總戎普

徐世昌大清畿輔先哲名將傳王普。字德輝。固安人。乾隆六年授永定河外委。補把總。會河決。落職。投江南營。辦理天妃閘。開官事務。累遷至文登營副將。三十九年以事鑄二秩。逆匪王倫擾壽張。臨清。堂邑。陽穀諸處。山東巡撫徐績督兵剿之。不利。檄普至東昌。九月七日戰賊於臨清周家店。身爲士卒先戰。六時

斬捕過當。賊不支始退走。疏聞以參將用。適將軍舒赫德額駙拉旺多爾濟兵繼至。會戰臨清。殲賊殆盡。臨清平復。副將銜。連擊諸郡賊皆潰走。普易裝梳捕民間匿匪。四閱月全境肅清。詔以總兵用。賞花翎。授河標副將。四十九年擢河南河北鎮總兵。十月入覲。問王倫事對甚悉。抵任獎勵將弁。教練士卒不職者。禡之。老弱技疏者汰之。一時賞罰嚴明。軍政肅然。五十一年伊陽奸民秦國棟聚衆戕官。聞警馳往。未至賊竄走。以是詳部議。先是賊起。邑民受迫挾。多附之者。至是皆遠遁。普下令悉招之歸。伊人尸祝之。普轄衛輝彰德諸地。凡九營。益以時簡閱而訓練之。嚴束士卒。有縱馬傷田間一禾者。輒鞭責之不貸。公餘訪

漢孝子丁蘭郭巨明趙烈女諸墓。明季王丁二忠祠。爲勒石表彰之。以勵民裕。五十五年上八旬萬壽。特詔復原官。召見賜食品等物。並御書福字玉如意。五十七年患目疾致仕歸。又四年卒於家。年七十有一。

固安鄉土志名將傳王普。固安城西丞相莊人。乾隆六年隸永定河營外委。尋補把總。後投江南河營。任外河効用把總。遞陞至文登營副將。尋以別案鐫秩歸省。王倫之亂。壽張臨清堂邑陽穀等處滋擾。莫敢嬰其鋒。九月巡撫徐績自東昌發六百里檄檄公。公即日啟行赴敵。與賊戰於臨清之周家店。自辰至午。賊勢猖獗。公督戰益力。身先士卒。殊死戰。斬馘無算。至晚賊退。

陞用參將。會將軍舒赫德七額駙拉旺多爾濟兵繼至。公隨二公連日與賊戰。臨清殲斃殆盡。臨清平。諸郡尙擾。公率所部兵潛至。出不意擊之。賊潰散。多匿民間。爲再擾計。公改裝緝捕。在壽張等處。凡四閱月。肅清。巡撫徐績以公素得軍心。奏聞。詔以總兵陞用。換頭品頂戴。賞戴花翎。改任河標副將。四十九年授河南河北鎮總兵。十月入都。召見。問臨清情形。公逐條奏對。十一月回任。賞罰嚴明。申約紀律。軍政肅然。伊陽奸民秦國樑聚衆戕官劫犯。公勦撫兼施。善良被脅者深感其德。所轄衛輝彰德河南開封陝州嵩縣王祿店與本標左右共九營。按時簡閱。公飭訪求遺蹟。得漢孝子丁蘭郭巨之墓。明趙烈女之墓。

女字某氏。未婚。

而壻逝。女矢貞。歸婿家。孝舅姑。**明季王丁二忠祠。**王諱漢。任河南巡撫。死於劉超之難。丁諱泰。任河內令。闖將劉方亮圍懷慶。城陷死之。

又於修武得漢獻帝陵寢。勒石以誌。五十五年因純皇帝八旬

慶典入賀。召見訓誨周詳。賞賜有差。五十七年乞休。四年卒於

家。年七十一。按聖武記王倫臨清之變。於公職績不詳。茲據王氏家乘。並邑故老舊聞。敘錄其概。子文勳。文昭。文煥。

王總戎自叙。王普。字德輝。固安人也。自乾隆六年在永定河營

効力。至十一年拔補外委把總。十五年永定河三工漫溢。罪誤

革職。在保定聽候審訊。至十六年經欽差兵部尙書舒公按名赫德。諡文

襄。正白旗人。審結省釋。嗣於乾隆十七年赴江南投營効力。以圖進身。

蕭蕭行李。子身獨往。茫茫前途。際遇難期。及到江南。至七月投

外河營効力。十八年蒙大學士總河高公。按名斌。諡文定。拔補外河營把

總。派在河庫道李公處聽候差委。適本年九月間河決張家馬路。高中堂李河庫均因之革職卸事。余功名之念已灰。欲回里

另圖奮身之計。尚書舒公同白公按名鍾山。正藍旗人。世居通州。諡莊恪。奉命赴江南

查辦河務。即余前在保定。以河務曾經二公審訊。得邀省釋者也。及往謁見。二公俱相待甚優。隨到高埧。令見總河策公。一見

蒙委代理天妃閘閘官事務。事竣尚書舒公旋京。白公放江南副總河。留余在轅聽差。相待更優。十九年四月白公陞山東總

河。將予咨部帶往河東教習椿埽。二十年正月初四日。委署左營把總。十月實授中營把總。二十一年拔補濟寧衛南汎河掌

印千總。二十八年五月。蒙總河張公按名師載。儀封進士。諡愨敬。題補黃運河

營守備。至三十一年十月。蒙總河李公

按名清時。安溪進士。

題陞濟寧城守

營都司。三十四年四月。蒙總河吳公

按名嗣爵。錢塘進士。

題署河標右營游

擊。三十六年蒙總河姚公

按名立德。仁和人。

東撫徐公

按名績。正藍旗舉人。

會題陞山

東撫標參將。三十八年蒙東撫徐公登鎮夏公

按名攀龍。浙江人。

會題陞

文登營副將。三十九年八月初三日。因高雲從案內革職。發交

東撫徐公審問。八月十六日審訊覆奏。奉到廷寄再問。八月二

十六日逆匪王倫在壽張縣作亂滋擾。徐公帶兵起身勦賊。嗣

於九月初四日。自東昌發六百里札諭。調予赴軍營。於九月初

五日到東昌。初七日跟隨徐公在臨清之周家店。同賊力戰一

日。賊勢猖獗。性命已置度外。惟思設法禦賊。旋經徐公奏請京

兵來東。予復蒙徐公保奏以素得兵心。調赴軍營出力自効。仰蒙皇上天恩。賞給參將職銜。帶兵勦賊。俟事竣之後。視其出力如何。另行奏聞。此後跟隨將軍舒公七額駙。按名拉旺。多爾濟。連日在軍

營接仗。勦滅逆匪事竣。蒙將軍舒公保奏。於四十年二月初九

日。奉特旨。河東河標副將着王普補授。在河標河協歷任十載。

此任內與次子華林。按名文昭。字如愚。捐納從九。修做東堤工竣。引見以

知縣補用。三子惠林。按名文煥。詳見下。以從九職銜。修做工段竣事。引見

以知縣補用。至四十九年。又蒙皇上天恩。特放河北鎮總兵。到任以來。冰兢自矢。對於地方防務。時時勤慎。故該地之民。垂碑

紀念。稱頌不忘焉。按後公次子華林。宦遊河南。任魯山縣事。

其後裔世居固安城南之獨流村。三子惠林。宦遊山東。任惠民縣事。其後裔世居固安城西之丞相莊。至今尙稱縣中閥閱舊族云。右稿獨流王君效先寄示

王縣令文煥

固安縣志選舉表王文煥。山東惠民知縣。

〔惠民縣志名宦傳〕王文煥。順天固安人。道光十九年知惠民縣。日行詞訟。隨審隨結。嘗曰。雀鼠之爭。無大冤抑。縱少失意。不愈於稽羈案下。爲胥役剝蝕耶。曩者差車取給於民。往往一車之費。擾及四境。至是首蠲免之。凡事之累民者。悉從裁革。由是力役粟米之征。爲其所令。無不順從。蓋其愛民之心。信之者深也。

〔山東通志職官表〕王文煥。順天固安人。道光十五年任泗水知縣。

〔固安縣丞相莊王氏家乘〕王文煥。河南河北鎮總兵普第三子。字菱湖。由監生遵衡工例。捐納從九品。分發簽掣山東。歷署嘉祥萊陽金鄉等縣。典史臨清州吏目。嘉慶十八年教匪之亂。公奉委馳檄赴保定。城閉不得入。後以繩繫檄上。得驗實始啟局。上官甚慰勞之。並詢沿途匪勢。人皆爲公危。後以勦獲荷澤縣逆匪王夢元。得旨儘先補用。二十四年調補濟南府司獄。汰獄卒。弊立減。囚皆德公。道光七年荷澤大盜李三知黨百六十餘人掠擾。公奉委勦緝。易服改裝。兩月悉擒獲無逸漏。累以考績

陞知惠民縣事。抵任見案牘如山積。逐一審訊。兩月結百六十餘案。多所平反。朔望詣鄉里。宣講聖諭。召鄉紳耆舊。詢風俗。問民疾苦。曉示百姓。諄諄若家人。有訟者。先勸導之。奸猾者治之如法。豪華胥吏。皆爲斂迹。歷年漏規。與溢征銀二千餘兩。言於上官。悉開除之。蒞任五年。二十二年。以親老告終養。未果。二十三年。託病引退。百姓知之。詣上官乞留。不可。瀕行。百姓送公者。遮道。公各勉以當盡孝思。當務農業。勿事欺凌。勿干國法等語。衆益感泣。不獲行。後請留其烏爲遺愛。二十六年。丁母憂。哀毀骨立。喪葬皆如古禮。服闋。上官敦迫赴省。輒以未痊謝。三十年。以疾卒於里。年七十七。公貌偉聲宏。與人談笑。隔院聞之。語頗

了。生平精敏。慷慨好施與。能急人患難。而性情平易無宦氣。故鄉人至今思慕。

高主政釗

固安縣鄉土志任恤傳。高釗。字小鋒。渠溝鎮人。由廩貢生奏賞戶部主事。天性謹厚。樂善好施。歲饑散粟爲食。待餓全活者無算。鄉鄰感德。上官贈爲善獲福匾額。子潤生。光緒十五年進士。授翰林院檢討。現官江南道監察御史。

鹽山唐烜高主政傳。主政姓高氏。諱釗。字小鋒。順天固安縣人。祖大鵬。邑庠生。性忼慨。篤交遊。以扶危救急。義聲震鄉里。父瑞和。拔貢生。官贊皇縣教諭。讀書耆古。博學能文。以贊皇土習陋。

教無可施。鬱鬱不自得。未及任滿卒於官。主政公持喪歸。教其幼弟讀。仍自習舉業。應京兆試凡二次不售。遂棄讀學耕。先是公自弱冠遊於庠。爲文以枕經菲史。沈博絕麗。著備饗序間。至是應鄉舉。初試薦而未中。再試則三場皆中式。已擬魁選。及拆卷朱墨互勘。因二場春秋題下漏書某公某年字樣。復見黜。公領遺卷聞其故。喟然曰。人言科名得失均有命。其信然矣。自是不復應舉。未幾遭母喪。泣血三年。盡哀盡禮。鄉人以學行聞之。學使舉孝廉方正。公堅辭不就。試乃具題獎訓導銜。時捻梟各匪相繼起。鄉鎮皆奉檄辦團練。衆推公爲練長。公慨捐鉅款。修防禦。旋獎五品頂戴。亦辭不受。會大旱。歲洊饑。公前後出穀數

百石。唱義振。並設粥廠於所居渠溝鎮之通衢。近鎮十數邨。貧困老弱皆就食。凡兩載。全活者無算。時爲同治六年丁卯。其秋大雨雹。郡司馬勘災過境。忽停輿。趣召鄉保問之曰。吾巡行逾百里。田中禾稼皆摧敗。獨此鄉一田。互數十畝。穎粟特茂。無少損。田主何人。操何術爲防。乃能若此。鄉保遽應曰。官不知邪。此吾鄉高貢生田也。郡司馬於是瞿然而驚。旣而躍然喜曰。高公名吾聞之久矣。特不謂雹不傷稼之事。古有其語。今乃實有其徵也。遂趨旅舍。手書爲善獲福四大字。並爲叙詳述顛末。命召工刊刻。曰。以此旌高公門。且以示世人。天道福善之說。爲不誣也。越日。郡司馬還輿過縣城。語之縣令。縣令固久亦傾慕公。嘗

刊推食芳徽匾額。具儀仗親送之門。行將列公善行請旌獎。及聞郡司馬言。乃合詞疏公前後諸善狀。白大府。大府遂上其事於朝。朝士亦多慕公名。因聯銜奏保。得旨以主事用。公仍欲辭。保者皆曰。此君恩不可負也。乃就職。籤分戶部浙江司。時長戶部者皆一時權要。爭欲致公門下。屢示以意。公陽爲不喻。其悒者。在部數年。除因公相見外。無攀談。無私謁。同官或微諷之。亦不答。退食之暇。惟課子讀書。齋前種竹數十竿。榜其門曰癖竹。以示澹於宦情。且志在避俗意。由是同官以爲傲。多不樂與游。公亦以事多拂意。嘗艱然謂子潤生曰。古言通經致用。學問之道。本大可有爲。惟一爲司員。則俯仰隨人。不能逕行己志。尙不

如鄉居作事。可以獨斷獨行也。爾異日或登仕版。必擇清要。可自立者爲之。勿復如我今日。旅進旅退。少自異。即騰笑竦譙也。又公篤于兄弟。嘗教子讀史記。至張釋之傳。輒太息曰。釋之恐以久宦減兄產。今吾浮沈郎署。亦將以久宦減弟產。汝宜早自立。慎勿竢父歿後。又累汝叔父也。蓋公一生孝友任卹。不汲汲於名利類如此。其生平剛介自持。勇於任事。而恥於趨勢。對人嘖笑未嘗苟。其卒也。晨起盥漱畢。整衣坐廳事。容色肅然。瞑目端跏。無疾而逝。鄉人得凶耗。不期而會者數百人。相與備靈輿。列鹵部。於喪歸時。恭迎四十里外。麀聚縣城北之永定河干。縣宰並爲除館舍。於城南關停輿受弔。盡一晝夜。翼日始相將送。

歸里。及葬時盛況復然。至今鄉里間銘功誦德。仍循道弗衰云。
配畢淑人。尤賢明。善訓子。事具公家乘及墓表。又公嘉言懿行
亦尙鏗。茲不備書。書其犖犖大者。以志景慕。

論曰。頌與主政公子潤生。春秋兩試皆同榜。竝同出鄞。張肖蒼
先生門下。且同壻海豐楊氏。爲亞兄弟。故於公生平知之最詳。
嘗讀公行述。仰見公篤行亮節。人知矜式。其所表見。皆不虛矣。
它姑無論。尤異者。雹不傷稼一事。彰彰在人耳目。豈天之報施
善人。果如其不爽邪。又公暮年。以在官未竟所愆。嘗戒子異
日仕宦。非清要職。勿就。兼有密訓。謂本朝曆數將終。務潔身自
愛。慎勿事二姓。墜家聲也。今其言皆驗。於戲。斯亦奇矣。

案唐君此傳。撰於民國五年丙辰。係因潤生堅拒洪憲議員之召。談及密訓。有感而作。厥後洪憲敗。人或僞潤生之先見。而罕有知爲守先訓者。訖今追念及之。潸然泣下。輒不覺白端之交集矣。戊辰春二月子潤生附注。

固安縣渠溝鎮高氏阡表另載本編耆舊碑誌卷

高主政遺著 今存詩六章

京居詠懷 凡六章章四句

第一 卜式章 明志也

卜式輸家半。急公非獵名。勉拜中郎賜。夙夜彌屏營。

第二 淵明章 避囂也

淵明喜咏菊。東坡好看竹。但使能醫俗。甯可食無肉。

第三 李白章 遠權要也

李白本奇士。荊州何足論。惜哉粲蓮舌。豔說登龍門。

第四 釋之章 念兄弟也

釋之困郎署。久宦徒耗產。家有紫荊榮。奈何戀豆棧。

第五 志士章 思鄉也

志士悲樾驥。壯夫恥轅駒。何如脫羈鬣。常羊還故吾。

第六 臚仕章 訓子也

臚仕疇不羨。清德須自矜。篋絕陳彭年。銜署一條冰。

右詩爲先嚴捐館之前數月。手書於歲寒三友之花箋。諄諄

相示。令切記勿忘。見背後謹藏舊書篋內。庚子一炬。竟化灰塵。嚮嘗深自痛恨。既不能光大先業。併此一箋手澤。亦不能慎爲保守。畱示子孫。今承鄉人采訪。特爲追錄。尤不覺汗淚之交下也。嘻。戊辰春子潤生附記。

附錄

順天府南路同知蕭履中書贈高小鋒君爲善獲福匾額叙文。丁卯夏旱魃爲虐。厥後得雨。播種已遲。以故歉收成災之處甚多。秋末余赴南路勘災。行次固安之渠溝鎮。邨外傷於雹。禾稼皆無存。獨高小鋒君田內。穎粟特茂。無少摧敗。心異之。詢諸土人。僉曰。高公夙好行善。前因旱故。特蠲米石。開設

粥廠。貧民賴以存活。雹不加於其地。殆天所以彰善人歟。余乃益歎爲善獲福之說。爲不誣矣。因以爲贈。同治六年小春月穀旦。

高國學鑑

固安鄉土志任恤傳高鑑。字寶光。戶部主事釗弟。天性孝友。行誼克副。乃兄志望。兄沒家中匱。其姪潤生幼而好讀。爲之延名宿以資教導。凡一切有用書籍。不憚重費購之。俾廣其學識。後其姪入詞林。乃欣然曰。吾今可對寡兄矣。其周急濟貧。人至今稱之。子潤民。廩貢生。鴻臚寺序班。

〔高氏新阡表〕另載本編耆舊碑誌卷

趙明經錫純

固安鄉土志任恤傳趙錫純字熙甫沙河口人廩貢生嘗問學

於新城王重三先生振綱

先生爲咸豐名進士與曾文正爲同年文正督直隸延主講蓮池書院

貌雄偉

急人患難不避艱險蓋儒而俠者也咸同間髮捻各逆方猖獗先生與同里劉茂才炳文倡辦南鄉團練製槍械刀矛數百件礮數十尊合衆排演同治六年梟匪之亂由新城犯固安避其鋒繞道馬莊鎮東竄永清界縣西南諸村得無恙新固之交迤南境有土賊乘南方多事蠢然思動結衆劫掠先生率勇勦獲匪首稟請縣令楊公應梅立照新章置之法僧忠親王率兵南下經縣境聞而嘉之奏獎六品銜新城巨盜王三爲一方患先

生率勇隨縣令余公汝修往勦。格斃之。直隸總督劉公長佑方駐兵馬莊鎮。先生布衣往謁。大爲所器。願攜之行。以親老不果。並閱視所練鄉勇。首肯者再。先生佐歷任縣令。理公務。如創書院。查荒地。皆義舉。獨杠無所顧避。縣令莊公允端初履任。疑其武斷。殊諭特嚴。公署出入界限。蓋爲先生發也。先生年餘不入縣城。並絕口不問公事。旣而莊公訪其賢且傑。會見之於馬莊鎮。舉凡弭盜詰奸。胥資其力。後因公被誣。以毆傷人命。訟先生於部。府牒下。役人趣提質到門。先生素業教讀。前後受業者百數十人。時方爲生徒。詳削課藝。坦如也。卒畢其事。出門登車去。了無憂色。其鎮定有如此者。事旋解。光緒三年。深冀河間等屬。

大荒旱。先生倡捐米粟。設粥廠待餓者。登簿者幾三千人。皆賴以全活。四年又設粥廠。先生即於是年染時疫卒。年五十八。當縣令余公之初辦團練也。簡舉縣中文士有聞望者數十人。以資助理。而才守兼具者卒鮮。獨先生魄力沈雄。且心境廉敏。使獲馳驅於曾胡羅左諸公麾下。其勳名事業。豈不足銘彝鼎而震寰區。乃竟限於一鄉一隅。莫從竟其學拓其才。爲可惜也。

萬國學三錫

固安鄉土志任恤傳。萬三錫。字顯相。城南三十里萬家莊人。國學生。忠厚宅心。耕讀教家。遇邑中興辦善舉。無不樂爲贊助。有山東海豐縣孫義者。在京以井租爲業。某年臥病萬家莊村旁。

三錫見之。昇至家。爲之延醫購藥。調養旬餘。痊愈。拜三錫爲義父。始去。嗣後每年赴京回里。必繞道萬家莊看視。多攜帶海中異種魚蝦。及同治十二年。三錫病故。孫義親至。伏棺痛哭而去。以故邑人多兩稱之。三錫第三孫執樞。光緒十九年舉人。第五孫執機。第六孫執桂。曾孫燾炬。皆諸生。稱爲縣中望族云。

萬國學湘林

〔固安鄉土志任恤傳〕萬湘林。字紫潮。三錫長孫也。國學生。忠厚一遵祖訓。鄉中急難。多恃以排解。教子尤勤。光緒十六年。固安大水。災之重爲數十年所僅見。湘林倡爲合村出字。代購穀米數百石。捐得應利二三千緡。鄉人恃以生存。其後附近數十村。

均聞而仿辦。賴以全活者無算。長子煦二十三年拔貢生。充省議員。諸子及孫列庠序者復數人。人多以爲行善之報云。

賈公

諱

光明

孫男廷琳敬錄

豐城毛慶蕃固安賈月塘先生家傳。光緒三十年夏。余督理永定河事。蒞固安。聞教諭陸君慶格言。縣人賈生廷琳。博學善屬文。可造材也。因延見之。嗣余承乏直隸藩司。電招之來。督其講求古今實學。迨後余提學江蘇。布政甘肅。兼權陝甘督篆。賈生左右追陪。情逾骨肉。一日嘗戲謂賈生。吾與子其先並無淵源。然一旦邂逅及子。而余教誨子。玉成子之心。比吾家之子弟。尤爲密切。竟不識其何以然。豈非子之先德。有醇德懿行。冥冥中

潛爲之感格乎。賈生於是言其鄉人。亦每以彼之舉優行。及與余相遇。皆由其祖若父積德之所致。且詳陳曰。先王父月塘公逝世時。廷琳方七歲。愚昧無知。但見前後來弔者數百人。無不痛哭失聲。若悼喪其親者。及葬復來哭如初。蓋先王父賦性端凝。氣象嚴正。言笑希簡。動履有恒。生平言表行坊。久爲閭里所矜式。德之及人者深。故人之感之者衆也。自年十九入原籍。霸州庠後。即課徒四方。殆將終身。所學自羣經及馬班諸史。宋司馬氏通鑑。古今稗官雜說。宋元人詞曲。與夫醫藥星命諸書。莫不精研力索。提要鉤玄。錄爲專冊。高逾尺許。用示學者軌轍。而於醫學尤精。生平所活人不可計數。手輯醫書。成脈理證治方。

劑鍼灸各門。精要豁達。使人研習。夙昔於制舉文致力極深。歲科試每列異等。而數奇。秋試屢薦未售。僅以增廣生終。凡假館所至。終日爲諸生講解。無倦容。以身作則。杖履尊嚴。門牆敬畏。每有相從二三年。終身基礎已確立者。晚年館穀所積。家漸充裕。辭歸故里。頤養。多有再三邀重履講席者。見同里劉生鳳池。聰慧善讀。家貧如洗。招之來親教導之。終歲不受其贄脩分文。遂獲成名于時。迨後廷琳讀書時。家遽中落。劉先生復親教廷琳。一如曩昔。以酬先王父之大德焉。夫此日廷琳之獲執贄於吾師門下。并稍稍忝竊時名。微吾王父生平積德累行。隱而弗曜。且手纂輯諸書。俾廷琳童年得資博識。又預教劉先生成名。

爲廷琳異日得讀書地。曷由致是哉。先王父生平義行尙多。惜廷琳生晚。未獲備知。倘蒙吾師軫恤寒族。譔爲家傳。以示鄉人。而傳奕世。家嚴與廷琳等感且不朽。余諾焉。遂就賈生所述。敘次爲先生家傳。先生諱光明。字月堂。先世由霸州香營。遷居固安南趙莊。故先生仍入霸州學。生於嘉慶二十年八月十四日。故於光緒十四年十二月十七日。春秋七十有四。夫人張氏。佐先生創成家業。禮法秩然。見推里黨。生於嘉慶十九年八月十三日。故於光緒二十二年四月二十七日。年八十有三。子一芳。芝。性至孝。事親無不至。獨傳先生醫學鍼灸一科。神效一方。無與比者。以義俠著稱里中。光緒十六年歲大饑。爲人多擔負債。

事。貧者始得保全。然力率不能償。遂變產代償。坐足家業。遽傾。遠近往往以五爺呼之。而不名。孫三。廷魁。廷掄。皆習農業。廷琳。光緒丙午科優貢生。從余遊。今供職陝甘督署。大清宣統元年。歲次己酉。秋九月。豐城毛慶蕃謹撰。

徐世昌清故增廣生月塘賈君墓表另載本編耆舊碑誌卷

縣人萬煦業師賈月塘韓月橋兩先生傳。煦自七歲時。隨從叔

子衡子鈞襄宸鏡愚四公後。同受業於本縣張允升。字旭東。賈師同里人。善山水。精

科疹張青來

黃筮人長於學。窠大書。

霸縣周鴻儒三先生之門。其時尙渾渾無

所知。亦不識先生學如何優。教如何善。今已不復能追爲記述矣。其後受益最深者。爲侍教於賈月堂先生三年。韓月橋先生

六年。月堂先生諱光明。居本縣南趙莊。增廣生。屢試高等。以數
奇未獲博科第。論者惜焉。性端嚴。品方正。無一刻不循禮法。寡
言笑。雖一介不苟取。且博極羣書。兼精醫卜。來塾時。煦年十二。
凡四子書及五經與漢唐詩古文辭。講解凡數周。他日略識各
書道理者。實基於此。月橋先生諱皎如。北莊人。家世讀書。師尤
嗜學。由廩生中道光二十六年副貢生。咸豐五年舉人。爲同縣
劉孝廉牲。字菊齋。道光二十三年舉人。官趙州學正。新城王進士振綱。趙貢生基復。高弟。
善書法。爛制藝。門下列膠庠。舉秋試者凡數百人。光緒九年。煦
以縣試第一入學。又二年歲試。以第一食廩。二十三年。以選
拔貢成均。微兩先生教授力。烏克及此。厥後同縣高棗坡師。教

以漢儒經訓小學。寧河高曦亭師。教以宋明朱陸語錄。與夫乙巳年赴日本考察教育。丙午年補習歐西法政。中間之討論。明清掌故。旁覽曾左諸書。或聞於永清王子惠師。或受自豐城毛實君師。而實皆由於童年。受月堂月橋兩先生教育之賜也。月堂先生孫廷琳。博學能文。有聲於時。月橋先生子三。均力農。今已式微。古人一飯之德。沒齒弗忘。而况兩師之教。益於煦者。實有以端蒙養而植始基者哉。嗟嗟。時至今日。師道不講久矣。古人所謂師嚴道尊之訓。誰復知之耶。於是慨焉而爲兩先生傳。

先王父月塘公遺著

今存詩十首

題河間苗仙露漢專唐瓦

築館延儒溯獻王。餘區二十久荒涼。遺蹤若并無專瓦。故址誰
猶識漢唐。蜀道殘碑埋宿雨。長陵萋草帶秋霜。苗君好古搜遺
寶。留得毛經一綫長。

里居偶吟

五十年來苦訓蒙。今朝始得出樊籠。兒孫笑語娛心意。不枉爲
人一世中。

觀書偶倦即高眠。眠足閒行故宅邊。夢蝶莊生情栩栩。逍遙自
在度餘年。

一身筋力未全衰。觀劇何妨屢屢來。世態炎涼皆似劇。有誰冷
眼愴中懷。

閑遊別自有心情。不計程途緩緩行。乘興獨吟還獨嘯。任人呼我做癡生。

高步青雲志未酬。聊從書館覓蠅頭。蠅頭幾許吾生老。得失雞蟲念總休。

不命巾車不棹舟。興來野外任遨遊。天寬地闊多歡暢。手種桑麻綠遍疇。

七旬已過尙康強。聽唱前村日日忙。朝往暮歸人莫笑。顛狂能得且顛狂。

一家聚首即陶然。豈必兒孫跨竈賢。往日離鄉背井久。回頭猶記夢魂牽。

不求富貴不憂貧。第一人間自在身。檢點手鈔書尺許。傳家聊種讀書因。

廷琳案先王父雜著詩文。晚年多自付灰燼。所留存者只此。至末首云云。惜廷琳等駑駘性成。不能上繩祖武。今展讀遺著。殊覺有慙負荷云。

曹明經飭

賈廷琳同縣曹雲樵先生小傳。先生姓曹氏。諱飭。字子端。號雲樵。吾縣城西中公由人。清舉人。內閣中書諱江之五世孫。咸豐中由固安城內遷焉。同治十一年歲貢生。候選訓導。生平質直和易。言動篤誠。藹然儒者。人莫不樂近之。家貧以教讀終其身。

及門就學者極衆。率發名成業以去。性喜吟詠。多深造自得之語。著有雲樵老人遺詩一冊藏于家。光緒二十年卒。春秋七十有八。孫樹殷。年十四應縣試。縣令謝裕楷奇其才。錄爲第一。逾年食廩餼。光緒二十九年舉于鄉。民國中歷任江西九江蓮花等縣知事。所至以儒吏稱。人謂皆先生積善累行之所致云。

廷琳按雲樵先生孫硯齋孝廉。與余昔年同受業於豐城。毛實君先生之門。維時廷琳年方逾冠。曹無知識。硯齋詩文奇肆。博學多通。廷琳雖在友列。而心殊敬憚。隱取以爲師資。厥後南北分馳。歷二十年。蹤跡未得合并。今年纂我縣文獻志。硯齋函札往還。殷勤指示。裨益弘多。並得稍聞。

雲樵先生言行之梗概。謹擬爲此傳。以存先正典型。且以見硯齋學識之閎博。今日爲吾縣人士所僅見。其家學之淵源。於此可微窺一斑云。

曹明經遺著

今存詩稿一冊錄十一首

李瀛仙明府重任固安賦以誌喜六首

并序

同治二年秋七月。瀛仙明府二次下車之日。萬民慰說。四境歡呼。咸謂善政善教。業已見之於前。爲國爲民。必能踵之於後。旣恤商而愛民。亦安良而除暴。兼之廣延道學。雅意衡文。作養人才。殷心課士。記當卸篆之初。即有再來之慶。今也果符人願。實出天心。名言莫罄。爰歌俚語數章。額

頌良殷。聊作漁陽一曲。愧非白雪之詞。擬學巴人之唱。

快觀烝黎笑口開。循良父母又重來。三年黍雨留遺愛。百里棠陰本舊栽。作令羣推經濟手。讀書不負棟梁才。花香燕寢秋風爽。看取廉聲達上台。

德政寬嚴仰大儒。喜教合浦復還珠。漫云舊尹仍新尹。差信今吾即故吾。父老據誠齊雀躍。兒童瞻拜各鳧趨。福星再照方城地。緣幸三生果不誣。

可卜於今訟不繁。官清差慰鈍兒孫。撫綏不藉桁楊力。感戴真同骨肉恩。此日錦城重蹟著。他年史冊早名存。高風無媿循良選。酌兕宜稱介壽尊。

昔年花縣政初成。四境歡然有頌聲。才拜清風仙吏去。又敷霖
雨庶民迎。廉明宜試繁難缺。竹帛曾標幹濟名。堪羨我公還愛
士。半爲司牧半文衡。

遙指鄉關遠隔秦。燕臺政績復回春。安民即具安邦略。聽訟能
希無訟神。廣布仁恩眞學問。不矜權術大經綸。文章報國非虛
語。霽月光風最可人。

循吏賢聲播士林。再來依舊費慈心。登龍文字明於錦。鳴鳳詩
篇雅叶琴。廣藝蕙蘭光上席。多栽桃李結重陰。醲恩渥甚誠難
寫。翹首崇墀再四吟。

桑乾河隄晚眺

閒步上金隄。登臨日已西。白雲凝不散。時有暮鴉啼。

方城竹枝詞四首

光緒十五年
清明節作

沙圍村落柳圍城。輻輳人煙樂太平。好是日斜閒處望。一犁春雨叱牛耕。

桃含宿雨柳含煙。畫出詩人得意天。更喜桑麻還蔽野。民風質

樸使君賢。

時謝大令裕楷
治吾縣有善政。

清明時節好風光。攜榼提壺祭掃忙。焚罷紙錢澆罷酒。梨雲樹下話斜陽。

南北通衢一坦途。桑乾古渡舊時呼。而今時過滄桑改。不見當年印月湖。

右詩十一首曹君硯齋錄示

李國學培源

固安鄉土志任恤傳李培源字濬泉貢監生南趙各莊人資性英爽慷慨好施予整齊其里四十年無賭博風同治十年永定河決奔注牯牛河幾潰溢先生率衆護堤自出米麪供食無吝色又捐義田十餘畝爲其村永遠差徭費鄉人感之公送望重一鄉匾額子仲瑄字薛頌光緒八年副貢生篤孝克繼乃父志甚爲鄉人稱云

廷琳按李濬泉先生爲余同里人性嚴正言笑不苟鄉人在其旁無敢偶肆者同治初余村最貧瘠諸宵小結黨滋

擾良善者不得安。先生力與相持。將尤桀驁者逐之遠村。嚴禁賭博。迄今歷六十餘年。鄉人守其成規。無敢以菑博相戲者。而風俗蒸蒸。男務農商。女佐內職。勤勞樸實。家給人足。羣推爲遠近各村之冠。且家室和平。近十餘年來。無一鼠牙雀角之爭。到訟廳者。涉公務者或有之。至箇人相訟事則無有也。皆先生有以啟其端。而里人蔣君樹義等。相與竭力維持。遇事排解。始克有此效果耳。所望後之人篤念前人倡導整齊之不易。而勿墮其成功。跂予望之矣。

李茂才滌源

賈廷琳同里李鑑塘先生事略。先生姓李氏。諱滌源。字鑑塘。余

同里南趙莊人。廷琳年十五六時。先生館於都門。每歲時歸里。廷琳猶及見之。今墓木已拱。名字翳如。州里間已無復能知先生者矣。然先生天性篤厚。博學多能。有其才有其學。而無其遇。遂令義行弗彰。身名埋沒。誠可悲也。今幸先生諸子。雖不能讀父書。尙能篋存其詩文雜著。守而弗失。今夏余長子錫琛。就其家蒐采叢殘各稿。費致津門。廷琳披尋讀之。多俊逸可喜。且每有就正於先祖父月塘公之作。遂錄存若干首。因略次其事狀。以存先生之梗概。先生生於道光二十四年十一月二十六日。祖萬春。父慶瀾。皆諸生。先生受業庭幃。年二十一入邑庠。爾後迭假館於鄉里都門各處。垂三十年。在京日受學於任邱邊子。

雅先生門。講求詩古文辭。又嘗從劉芥舟先生學習繪事。雅擅
眞行書。兼精篆刻。才名藉甚。然數奇。屢試未得一第。生平喜交
遊。輕財重義。世罕其儔。安徽潛山縣徐慶雲者。以武職赴京。嘗
道經吾里。先生與暢談。深相契合。邀至家。結金石交。後徐在都
困苦。先生迭爲變產以扶濟之。坐是家有田百三十畝。輾轉罄
盡。及徐統所部兵。攻擊金陵粵寇。以失主帥意無功。左遷甘肅
蘆塘營。遊擊。屢邀先生至其署相助。先生卒謝不往。而終年假
館如故。徐嘗命其子賫金四百入都。以償昔所假者。不過十之
一耳。先生亦不肯受。悉數爲購冠帶以貽之。故徐銜感甚。光緒
二十五年六月十六日。以瘍疾卒於家。春秋五十有六。徐聞赴

悼痛。親來余里。撫棺慟哭以去。又有霸州王澤普者。以捐納武職。請先生貸他富室多金。後王竟負心。不肯償。先生不得已。以已產代償之。後與王涉訟。霸州牧陳公閱先生稟牘。奇其才。並令在堂賦詩。先生立成一絕以獻。陳公嘉歎。贈書籍多種。卒批飭令王歸欵結案。先生以重義氣故。晚年家貧如洗。子迺賡等遂無力讀書。論者惜之。又先生在京日。交遊甚廣。與人唱和詩詞頗多。皆不存。其他義行。子孫已不能舉其辭。故不備載云。

李茂才遺著

今存鴻雪集詩稿一冊錄二十首

韓琴蘇硯歌

固安鄉土志曰。王龍韓氏。爲唐昌黎文公後。雍乾間自浙徙固安。卜居王龍村。擅醫術。藏有文公手製琴。與宋蘇長公饋韓

魏公硯。珍爲世寶焉。

我聞歷代法物萃名都。家家什襲藏雲樹。窮鄉之士徒望古。如

從行潦撈珊瑚。藝苑流傳大手筆。馬班而後惟韓蘇。二公文章

冠百代。泰山北斗垂型模。後儒亦可羹牆見。遇諸想像疑模糊。

一琴一硯忽在眼。快如滄海獲遺珠。有操可讀銘可辨。龍池年

月諒不誣。安絃磨墨興飛越。當年韵事恍與俱。誰抱此琴隨南

海。誰捧此硯侍西湖。古調獨彈潮鱷徒。醉筆橫掃杭妓娛。數百

年來幾兵燹。鬼神呵護極辛劬。難比湯盤與禹鼎。差勝玉印珍

婕妤。錢塘襄理人藏河間苗生性嗜古。漢磚唐瓦拾壘墟。此為褐

夫初懷玉。但有瓊球無瑾瑜。苗名學植號仙錄有漢磚唐瓦按苗先露名夔此原注作學植或係當日原名今已無

人知何似君家守先澤。昌黎眉山一室居。興來摩挲與古會。湘

娥顧盼龍賓趨。至寶豈可百金易。吁嗟乎桑乾俗吏空覬覦。以有

金求售者
韓公却之

捕趨織行

秋聲滿院桐陰老。濃綠深深變芳草。多情趨織良夜鳴。金屏翠
幙驚寒早。嚶嚶唧唧含清商。依稀玉笛翻伊涼。微物偏能解人
意。隔窗催織憂無裳。如何雅韻傳時晦。幽人往往心乎愛。提籠
著屐何處尋。僂僂循牆開草昧。自知微細防多端。壁居穴處隨
遇安。蝨蟲妙有避人知。材取王孫良獨難。相邀佳侶窮剔搽。豆
籬屢過行荒邱。拔茅發伏見頭角。勢當覆手身難抽。色青背闊
斯爲最。張牙振羽聲洪大。逢場樂鬪秦俗同。勝負須分朝夕會。

近牀有意伴長吟。音如金玉無遐心。急管哀絲同感觸。悲歌慷慨豪情深。人生天地須行樂。一物一名俱有託。箇中佳趣自參

詳。豈效傳經賈秋壑。

廷琳案宋賈似道有蟲經一卷爲論促織之專書

弔天津知縣謝忠愍公子澄二首

蠻荆蠶起逼津門。獨著青衫振虎賁。苦戰不知身蹉跌。竟教千載哭忠魂。

衆志驚惶一戰豪。可憐碧血染奔濤。英雄自古多危難。猶想丹心日月高。

題報恩寺井二首

有序

明師克京師。危學士素投報恩寺井。僧大梓出之曰。君知

國史。君死則國史亡矣。乃降。

精藍古井。渺寒流。報國捐軀。孰與侔。忠憤一腔。危學士。可憐轉念。誤千秋。

國變方將大節伸。紫衣饒舌累成仁。一從世罕王炎午。多少偷生藉口臣。

謁精忠廟觀燒秦檜二首

有序

京師精忠廟祀宋岳武穆。每歲正月。必塽作鉅公狀。炙石炭於腹中。名曰燒秦檜。亦鑄鐵像跪祠前。意也。

武穆祠前像鑄秦。千秋公忿總難伸。陶形更被焚如慘。一樣臍
鐙燦爛陳。

爛額焦頭亦快哉。赫如火判漫相猜。年年社會人如海。惜少清涼居士來。

弔古戰場

氣慘風悲太寂寥。不知何日息征徭。月明故壘魂安在。雨打寒沙骨亦銷。

金陵戍三首

夜半猿聲隔嶺頭。月明猶憶六朝秋。空將千載離鄉恨。付與秦淮日夜流。

壯志期成報國謀。萊衣未戲雪盈頭。可憐終夜潺湲水。不與離人滌客愁。

旗旌搖落故鄉秋。望斷征衣寄總休。幾度西風寒透骨。夢中疑是古涼州。

題墨菊圖

隱逸何心入畫圖。秋光冷淡影形孤。多情繪得東籬態。爲問淵明愛也無。

夏日訪友

秦世餘腥已久灰。如何吾道等塵埃。休嗤教讀成羈客。猶得偷閒訪友來。

和春閨怨原韻

入夢鶯聲百囀柔。泪痕團作水晶毬。畫欄倚遍驚春晚。獨對天

邊月一鉤

雪後逢旅人

四顧漫漫雪載塗。不知驢背有詩無。他時睡味甜于蜜。盡日離情苦似茶。作客竟教寒至此。因人唯計熱何如。栖遑相遇誰相識。回首關山萬里餘。

秋日即景

多情惟欲挽光陰。佳景相招直到今。竹總當風難折節。葵非向日不傾心。夢魂約蝶尋花宿。詩句隨蟬抱樹吟。秋思百端誰與訴。冥鴻雲路是知音。

雪後旅情

晚風吹雪暗長途。一片歸心倏有無。投宿影孤茅店月。強餐腸
斷稻鄉鱸。雲鬢倒亂羞窺鏡。翠被單寒怯解襦。那識客情易惆
悵。曉鐘聞罷又啼烏。

雲鬢一聯。係向開某旅邸題壁句。今因客情感觸。遂足成之。

題貞女服闋殉葬

正氣氤氳接帝京。曲全坤德使人驚。青年待嫁甘冥配。黃髮銜
悲感竭誠。杯土幾時埋節孝。瑤池千載照心情。世風益厚多貞
潔。合遣神巫鼓吹迎。

初秋曉霽

悠悠清夢誤黃梁。曉起空庭怯嫩涼。夜雨暗滋金鳳藥。秋風新
送玉簪香。雲開雁路詩情遠。山入雞窗畫意長。景物何須甘寂

寔呼朋把酒話農桑。

右詩二十首同見鴻雪集遺稿

李明經仲瑄

順天府志選舉表李友杕。固安人。光緒八年壬午科副貢生。

賈廷琳同里李薛頰先生事狀先生諱仲瑄。字薛頰。一字筱泉。吾同里南趙莊人。光緒八年壬午科副貢生。榜名友杕。字琴堂。後因讀明薛文清公讀書錄。景慕其學。遂改焉。先世居固安城南尚各莊。清康熙中徙居吾里。世以資雄。歷數百年弗衰。父諱培源。字濬泉。國學生。嚴毅剛果。有功於梓里甚鉅。詳見固安鄉土志。先生生於咸豐六年十月十二日。少多疾病。就傳後同學。

者十許人。皆聰穎善讀。先生獨艱於記誦。用是益刻苦自勵。父
濬泉公亦督責綦嚴。兢兢悚惕。負牆不敢一刻弛。所延致者。率
皆鄉國名師。俾廣其業。光緒八年。與同縣高棗坡先生潤生。同
中是科副貢生。自是交益篤。學益進。後高公成進士。入詞林。而
先生屢試不第。遂絕意進取。嘗以儒者獨善其身。既無名位。以
兼善天下。必先以擴其善於鄉邑始。當某歲大饑。請於父濬泉
公。備錢數百緡。以貸里中困乏者。弗責之償。濬泉公嘗捐腴田
十一畝。代村人納一切差徭費。後因費日廣。而租穀不足給。先
生推廣先志。更捐腴田三十畝。以益之。迄今兵燹連年。人多蕩
析。而我村人永遠不復受差徭之苦累者。皆食先生之厚賜於

無窮也。先大夫瑞符公曾爲之呈請縣署立案並赴都門乞文於高公棗坡。撰李氏義田碑記以章顯之。乃今日無知者以先生之捐助義田由先大夫慫恿之力而成。則于先生善承先志孜孜爲善之素心豈不悖哉。先生家有負郭田千數百畝。以十之八九佃與里人之貧無產者。每歲租穀比他富室率減一倍。且於秋成後方始收納子孫至今尙謹循其法弗敢輒易。每歲時令節凡里中篤好者困乏者孀孤者酒食穀果紛然投贈。歷久不衰。先生誠可謂性命於善而恢宏其解推之量者矣。生平事親篤孝。母劉太夫人染沈疴。先生躬侍湯藥。不解帶者數十日。母服未闋。父濬泉公繼患風痺。不良動履。先生入供食飲。出

操几杖。愉愉孝養。歷六七年如一日。嘗購今日所謂人力車者。輓其父遨遊里閭。以爲笑樂。每出環觀者濟濟。莫不歎羨焉。先生有姊一。適永清李家口趙氏。家落貧窶。先生按月給以薪米。終其身。沒更身任葬事。族叔諱清源者家貧。停其祖母柩十餘年。母柩六七年。力不能葬。先生資助之。俾安宅兆。又嘗獨力創修祖塋。植松柏數百株。築垣墉數百丈。豐碑祭案。以次畢立。至里中三義財神等祠。今日整潔如新者。皆先生重修之力也。光緒二十六年。拳民肇亂。聯軍入京。天子西狩。先生憂憤甚。適濬泉公於是年八月逝世。益哀毀慘怛。誓以身殉君父。先大夫及諸友朋。每曲喻以解之。明年和議成。亂事弭。先生鬱憤殉世之

志乃稍弛焉。性極和藹。與人交莫不親若昆弟。故每出里中兒童僕圉。率尾於後以相懽。其樂易有如此者。卒於宣統三年冬十月。年五十有六。子一則沆。剛果復如其祖。女一適霸州台山韓書英。孫一文海。

同里賈廷琳曰。先生性喜典墳。每節縮衣食。購致羣籍。貯滿數屋。廷琳幼讀時。家貧無書。先生與先大夫誼至厚。而弟畜廷琳。每有討論。輒以衆籍資焉。及豐城毛實君師。延見廷琳於永定河道署。頗訝其聞見不似鄉曲士。詢其何所得書。則以先生時常借閱對。翌日毛師遂傳命訂期。延見。先生卒謝不往。其澹於世情如此。今逝世忽忽已十七八年。而誌銘未具。懿行將湮。故

就粗所知於先生者。撰爲事狀。以示世人。語所謂鄉先生沒而可祀於社者。先生殆其人歟。自先生沒。而吾鄉孝友睦婣任恤之風。掃地以盡。此廷琳每低徊軌範。輒慨慕於無窮也。

縣人高潤生李氏義田碑記另載本編金石文存卷

文茂才藻翔

固安鄉土志文學傳文藻翔字蔚丞祖家塲人廩膳生父鏞

原名

慶祥

由御史任湖南岳州府知府藻翔在署讀書頗涉經史而不

喜屬文然性警悟樂籌筆筭凡中西算學家言多所研究著有籌算律呂辨證若干卷刊行光緒庚子拳匪之亂殉難于通州

文茂才遺著

今存序一首

律呂新書淺釋自序

庖犧畫卦。爰作九九之術。以合六爻之變。暨於黃帝。神而明之。陰陽以協。律呂以調。故韶咸夏武。相繼而作。自暴秦焚書。樂經散軼。九章六律。更渺不相涉矣。漢儒掇拾煨燼。僅存樂記數語。自後雖發明律呂。代有傳人。然於圍徑之長短。累黍之縱橫。僅用徑一圍三之古率。略爲詮解。求其縝密詳明者。卒不可得。國朝定鼎以來。遠人慕化。海外奇書。捆載而至。咸同之際。海禁大開。各省大吏。奉文創建學堂。延攬西士。競翻譯歐洲典籍。因之算學天學格致諸書。以次印行。雖其中踳駁不倫。而幾何原本十五卷。實足補六經所未備。惜彼族務於富強。僅求微積。與管

晏商韓相近。以致習西學者。亦攘臂而務權利。抵掌而談製造。又何暇以曲線之精深。闡律呂之秘奧哉。聞有一二精進之士。考尺度之廣狹。驗節奏之疾徐。而語言不詳。支離強合。無怪學者。考鐘律之精微。每望洋而興歎。余留心術學。十有餘年。而重惜律呂算學。歧而爲二。思有以引近之。適家大人權攝江西鹽篆。隨侍衙齋。俗務頗尠。因取御纂性理精義。所載律呂新書。詳爲撰擬。雖云度數之末。而以六律正五音之理。亦隳括無遺矣。至於辭句之淺質。體例之參差。見哂高明。所不計也。光緒丙申律中大呂之月。固安蔚丞文藻翔自序。

右見原書刊本

附錄

〔石念慈文君蔚丞律呂新書淺釋序〕自黃帝斷嶰谷之竹以
諧鳳鳴。因之三分損益。隔八相生。而陽律陰呂。於是乎定。夫
律呂者。占之氣候。所以探造化之微。施之廟堂。所以昭中和
之德。驗之人心。所以徵性情之蘊。此中之理。自極精微。無與
乎數算也。而度量權衡。實生於是。故布黍而知長短。廣狹。累
黍而識多寡。輕重。莫非準黃鐘之管。以爲率。則黃鐘實數算
之權輿。六律即九章之根本。歟。自秦火而後。樂經散軼。後儒
之發明律呂者。僅以徑一圍三。略爲詮解。殊未得其密率。其
習算諸家。雖各句深索。新義日出。而數典忘祖。又鮮有究

心律呂。取成書而詳爲釐訂者。文君蔚丞。績學淵懿。殫精九數。著律呂新書淺釋。以正古率徑一圍三之誤。法不外開方。數則得其密率。俾推算者知本於黃鐘。調律者不爽於古尺。隸首伶倫。合爲一家。洵前賢之功臣。後學之筌蹄也。夫。光緒二十二年歲在柔兆涸灘大呂之月。羅田敬臣石念慈謹敘。

見原書刊本

朱處士琳

蓬萊王養年固安朱良璧先生傳略先生諱琳字良璧固安城南南宋村人。生三歲喪母。繼母徐視如己出。鞠育恩勤。稱於里黨。年十三父復逝世。因家業繁冗。楛柱乏人。不得已棄學歸農。

非其志也。先生性孝友。事親敬長。鄉里無閒言。居心尤仁恕。遇急難。解推無吝色。清同治六年。京畿大旱。繼以雹災。情奇重。比戶多乏食。先生家存積穀數十石。罄所有。悉以周濟貧乏者。或署券來。先生立火之。全活者不計其數。自以早年失學。有暇輒把卷誦讀。故於醫卜農圃書畫奕碁。無不兼通。以多才藝。見稱於時。生於道光二十三年正月十一日。故於光緒二十八年十一月十三日。享年六十。妻平氏。子二。長建勳。武庠生。平生無遽言愠色。孝弟慈和。根於天性。次建業。文庠生。接人處事。公而無私。所行事無不可對人言者。要皆有先生風焉。孫炳離。炳文。皆高等小學校畢業。余與炳離爲文字交。故稔聞先生行誼。綦詳。

遂不辭讓陋而爲之傳。

廷琳按先生次子建業。字潤南。處鄉極和厚。每爲人排難解紛。不遺餘力。鄉人公送德隆望重匾額。以誌感戴。與廷琳相友有年。去歲更申以婚姻。以其女字余次子錫珪。此後當益加親厚焉。

魏明經聯芳

賈廷琳同年魏菊峰先生傳略。魏先生諱聯芳。字菊峰。其村曰林城鋪。距余村只二里許。父元俊。字彥軒。縣學生。先生少日貧甚。彥軒翁教授鄉里。先生相依館舍。日食粗糲。益奮勉向學。刻苦倍于恒人。弱冠後入庠序。繼食廩餼。以善制舉文負聲于時。

每屆歲科試及書院課試。輒列高等。光緒中寧河高熙亭師。諱

恩。諡文通。官至太常寺卿。清季主講陝西存古學堂。廷琳自甘省往還。數次謁見。深蒙寵愛。國變後。退隱盧臺。屢賜以手書。殷殷勗勉。以耆儒主

講吾縣方城書院。振興儒術。尤雅重先生。時先生每歲假館都

中。往來師門亦最久。稱高足焉。顧先生文所證雖深。然數奇。屢

試棘圍終不售。廷琳十二三歲時。從業師劉翰臣。名風池。原曠生。宣統元年考取。

職貢。民國九年春卒。年五十一。先生讀書於村東佛寺之古柏山房。先生每歲時

由京歸里。必數數來塾中。縱談文藝。窮日夜不厭。廷琳竊從旁

得聞所未聞。心樂甚。先生亦獨偉視余。愛如弟。蓋翰臣師本先

生弟子。而先生父彥軒翁。則又先大父月塘公弟子也。故先生

不以小門生相視。而以弟畜焉。一日詢余何字。對以童年無有

先生遂爲製字君玉。朋輩中遂競以君玉字。余後廷琳瀏覽各書。得自漢至清末。古今字君玉者四十餘人。遂輯爲君玉字考一卷。以備遺忘。然亦可見先生學業之有本源矣。某年歲科試。先生名第一。逾年再試。翰臣師第一。又後年先生復第一。再後年廷琳忝第一。三人者迭膺首選。如循環然。事雖箋箋不足道。然亦不可非一時佳話也。先生既終不得志於有司。年屆五十。始錄取光緒三十二年丙午科優貢生。廷琳亦忝預焉。明年朝考後。先生以府經歷就職奉天。到省方數月。一日覺體微不適。自往藥肆尋醫。猝傾倒遂卒於某藥肆門。鄉友永清孟巡按憲彝。時方官奉天太守。醵金返其櫬於家。光緒三十三年冬月某

日也。生於咸豐七年正月。春秋五十有一。子一某。篋室出。所著有固安物產志二卷。爲廷琳所藏。又有筆記一冊藏於某。

李明經芳園

縣人王尙義香圃李先生事略。吾縣近數十年來。言文學道德。清廉刻苦。必於香圃李先生。首屈一指焉。先生諱芳園。外河村李氏。香圃其字也。光緒十一年乙酉科拔貢生。居恒莊敬自持。氣象嚴整。而接人誠懇虛和。人自畏而親之。生平一言一動。無不合於禮法。尤嗜義理心性之書。兼通子平星相諸術。家貧設帳課徒。所至以身教而不以言教。從之遊者。率多以品學著聞。而韋煥亭先生炳文。德器粹然。以善教冠於吾縣。尤爲先生高。

足弟子也。有清自經庚子變後。改科舉。興學校。藉圖自強。先生於光緒二十九年出任地方學務。創興城鄉各校。一切務求實際。而不事外觀。雖形似簡略。然每年爲全縣節省浮費。不可以數計。較之隣縣務觀瞻而揮金錢若土芥。鄉民受無窮之累者。相去不可以道里計。維時豐城毛實君先生慶蕃。以名儒督理永定河道事。性喜陶淑人才。振興儒術。爲歷來河臣之冠。嘗訪縣人善讀書學業可期深造者於先生。先生因推轂劉孝廉峙。萬選拔煦。韋茂才炳文。曹孝廉樹殷。賈明經廷琳。及尙義等六人。迨毛先生陞任直隸布政使。羅致我縣諸人於藩署儲才館。講求身心經濟。一切有用之學。厥後多獲成名於時。皆先生前

此推荐之力也。宣統元年曾赴日本考察學制。深有心得。歸國後益加勤勉。徧閱縣屬四鄉小學。雖當深冬嚴寒。炎夏酷暑。先生隻身策蹇。僕僕道途。其勤勞有爲少壯人所不堪者。而先生獨樂此不疲。蓋先生每爲一事。無不本至誠心。果毅力。以貫徹始終。初不因艱險而或輟止也。三年在吏部簽選鹽大使。分發河東。適武漢變起。未及赴省。仍接理本縣教育事。民國八年因積勞歲久。感受寒溼。以癱瘓脚疾卒於家。春秋七十有一。聞者無論識與不識。皆歎息曰。我縣端人宿學。從此逝矣。相與悼痛者累日。則先生德澤入人之深。從可知矣。子二。長杏林。業儒。次英林。高等警務畢業生。

李明經遺著

今存詩三首

赴日本考察學制舟中口占

萬里浮槎海國秋。爲參學制赴瀛洲。中邦枉被空文誤。禮失翻
教向野求。

良友同舟最有情。雄談四座快生平。漫云橫海波濤險。破浪乘
風壯此行。

島嶼蒼茫眼界開。水天一碧淨無埃。神山隱約雲端現。想像今
番換骨來。

右詩載李明經東遊日記王君喩齋錄示

石武孝廉蘊芳

縣人朱建業香圃石公傳略石蘊芳字香圃無爲莊人。先世居

新城縣韓村營。其曾祖徙居固安之無爲莊。今爲該村望族。公

幼讀書。長棄文就武。入武庠。中光緒元年乙亥科武舉人。誥授

武騎校尉。性篤厚。孝親敬長。將以至誠。里有紛爭者。爲之分辨

曲直。勿使涉訟。有困乏者。爲之推解衣食。俾免凍餒。自奉亟儉

約。而待人則極篤厚。因是義聲動乎遐邇。語公姓字。雖婦孺亦

多知者。鄉鄰公送干城望重。方正和平。各區額以頌其德。子弟

有習武事者。多喜列公門牆。以受教誨焉。公生於咸豐四年。故

於民國十五年。年七十有三。妻張氏。賢淑識大體。生子五。長毓

琦。武庠生。次毓珩。國學生。三毓瑛。縣議會參事。四毓珂。精醫術。

五毓梅。善書畫。生女二。長適永清縣后奕鎮劉姓。次適同縣萬家莊萬炬。清孝廉萬公執樞之子婦也。孫男七。孫女六。子孫熾盛。家業豐亨。人皆謂公積德之報云。

王茂才芬

縣人賈士魁業師王香國先生行狀。先生諱芬。字香國。姓王氏。縣城西南公由人。與士魁同里閭。世有潛德。先生喜讀書。冥心孤往。不逐時好。爲文質直無雕飾。弱冠有聲庠序間。而尤以書法稱於時。積書畫多種。蚤夜寢饋其中。每於稠人廣坐。輒取所藏與共欣賞。先生生時。父適齋公已先沒。比三歲生母又見背。而孝友性成。年稍長。推所以事父母者以事祖父母。及嫡母。皆

能曲當親意。以博其懽。及沒喪葬皆盡禮。生平喜談諧。與人言輒以機警勝。人多敬服之。性篤厚而愛人。廉於財而施予無所惜。赴人急難不待請。爲人決曲直。皆心說誠服。有爭論者。輒於先生取決而不聞於官。鄉里有事。爲設方略。或倡爲之事。罔不濟。由是遠近宗仰。識與不識。咸以先生爲矜式焉。民國十二年。被選爲縣議會議長。縣中諸事。一惟先生裁決。是聽。遇事獨持大體。議論侃侃。必使言之可行。行之可久。究民情僞達之官。損益官所施爲。推之民。以助成縣中善政。先生文學品望。允爲吾鄉冠。故一時人士多暱就而親敬之。門庭濟濟無白丁。從政門內。教子孫以條法。男婦長幼。各執所業。家人數十口。率皆循循。

規矩。有過面叱之。咸怡然順受。無忤容。其家教之嚴整如此。今年夏六月。以疾卒於里第。春秋六十。配趙氏。先先生卒。繼配丁氏。子四。潤。章。憲。章。守。章。爲。章。女三。孫四。孫女六。烏乎。方今舉世競尙新文化。後進少年。率多厭薄老成。以爲不足稱道。抑惡知樸學如先生。乃世所急需。而里黨教化。所急賴以維持者耶。今先生既逝。哲人其萎。異日陵谷變遷。恐遂湮沒而無聞。故謹撰次事狀。以詔來世。後之觀於斯文者。果有追溯先正之遺風餘韻。低徊反復。而不忍釋者乎。蓋非士魁之所敢知也。民國十七年秋七月。門人賈士魁敬述。

王總戎事彙補遺二條

清王先謙東華續錄乾隆三十九年秋七月丁丑諭軍機大臣等。太監高雲從洩漏道府記載一案。昨審訊高雲從。供有高雲龍在臨清州當長隨。今覆審高雲從。據供並不認識臨清州知州。係託曾押貢到天津之參將王普。懇祈將伊弟高雲龍帶往山東。尋覓跟官等語。王普身爲武職大員。乃敢與太監認識。聽其屬託。將伊弟代薦長隨。殊屬不堪。著傳諭山東巡撫徐績。即將王普革職。嚴審確情具奏。將此由六百里發諭令知之。

又。是月己卯諭。向來內外各官奏事。設有奏事處。官員接遞。轉交奏事太監進呈。所以使宦寺人等。不得與外人交接。乃奏事官員日久懈弛。致有山東隨至天津之參將王普。與太監高雲

從認識屬託。高雲從不過寫字處下賤太監。何得與外省參將相識。則是太監等與外廷官員。在宮門覲面交談。大概可知。高雲從著即處斬。

廷琳案。乾隆中太監高雲從一案。輾轉牽連。大臣自侍郎蔣賜棨以下。被重罪者數十人。而以一長隨故。山東大小各官。被重罪者亦衆。我縣王總戎猶其案中罪名較輕者也。蓋高宗意在整飭朝綱。故借此以興大獄。使宦寺等杜口不敢談禁中事。後又因諸臣無他大過。各從寬宥云。

曹明經事彙補遺一條

衡水劉乃晟雲樵老人家傳。曹飭字子端。號雲樵。清舉人。內閣

中書江之五世孫。曾祖諱昌齡。祖諱人驥。字德良。父諱汝桂。皆縣學生。妣氏趙。世居縣治東北之曹興莊。爲固安著姓。清康熙時。永定河改道。厥後北岸時有決口。田畝沙淤。家道中落。咸豐初。河患彌甚。十年庚申。徙居縣西之中公。由迄今六十餘年矣。七齡時。受學於祖考德良公。性聰穎異常。童。德良公督課之。嚴加訓迪。入學後。有聲黌序間。十試鄉闈。不售。同治十一年。歲貢生。候選訓導。生平質直和易。言動篤誠。藹然儒者。人莫不喜近之。家境蕭條。以教讀終其身。及門就學者極衆。從不計及脩脯之厚薄。家貧者尤誘掖不遺餘力。率發名成業。以去。至今里黨稱道焉。性孝友。爲幼弟純授室成家。扶植之數十年如一日。喜

吟詠胸懷恬淡。多自得語。著有雲樵老人遺詩一冊。藏於家。光緒二十年九月卒。年七十有七。子光第字杏橋。縣學生。居鄉急公好義。人多敬之。年七十卒。無子。以弟榮第之子樹殷兼祧。孫樹殷年十五應縣試。縣令謝裕楷奇其才。拔置冠軍。逾年科試優等。食餼。光緒二十九年舉於鄉。民國中。歷任江西蓮花九江等縣。所至以勤廉稱。人謂其祖積德之所致云。昔姚文公序馮氏三世遺文。五世儒仕。鬱爲清風素望之家者。百四十有八年。庶幾古之世德。今曹氏自中書公崛起於先。兩弟前後舉於鄉。姪以孝廉。宰鄂之公安漢川。政績卓著。中書公七世孫樹殷。與乃晟同官贛省。相處較久。考其家世。繩繩繼繼。十餘世書香不

絕視姚氏所稱年數。殆已倍之。嗚呼。其可風已。

李警院天翼事彙補遺一條

見卷十

金史循吏傳論初辟舉法行。縣官甚多得人。餘如興平令師夔。臨潼令武天禎。長社令李天翼等十六人。皆清慎才敏。極一時之選。而能扶持百年將傾之祚者。亦曰吏得其人故也。

楊檢討秀事彙補遺一條

見卷十七

清法式善清祕述聞雍正七年己酉科順天鄉試。取中解元楊秀。字掄升。固安人。正考官禮部侍郎鄂爾奇。鑲藍旗人。副考官兵部侍郎楊汝穀。懷寧人。四書題。參乎吾道一節。天地位焉一句。如七十子至無思不服一段。

